

1 Coodintoidi

inänite Pabodo cadota ante tänota nänö yewæmongainta

**Coodinto iñömö Codito
ingante nāni pönencabo**

1 ¹Wængongui angä eñëningue Itota Codito botö imote aa pedingue da godongä godömo inte botö Pabodobo yewæmömopa. Mönö tönñäcä Totënë tönö guëa apänete ate yewæmömo aedäni. ²Coodinto iñömö mīnitö Codito ingante mīni godongämæ pönencabo inöminī inte eñëedäni. Wængongui, Botö quimīni badingue mīnitö Itota Codito nempo quëwëningue tæiyæ waëmö ewocate quëwencæmīnīmpa, ante cædinque añecä pönimīni inte mīnitö acæmīnīmpa, ante yewæmömopa. Ayæ adobaī, Mönö Awënë Itota Codito emöwo ante nē aa pedāni tömämæ quëwënanī incæ acædänīmpa, ante yewæmömopa. Itota Codito iñömö mönö Awënë ingä incæ tömënanī Awënë adocä ingampa. ³Mönö Mæmpo Wængongui tönö mönö Awënë Itota Codito godongämæ waadete pönö cæda ate mīnitö gänë pönente quëwencæmīnīmpa, ante botö Totënë tönö ämönapa.

**Codito nänö entawëno bai
nanguī entawëmopa, ante**

⁴Wængongui waadete pönö cæcä ate mīnitö Codito Itota nempo quëwëningue tömengä nänö entawëno bai nanguī entawëmīnīpa, ante adingue botö mīnitö beyæ ante Wængongui ingante waa ate pönëningue cöwë apänebopa. ⁵Edæ Codito nempo quëwëñöminite tömengä nänö ate eñëngainö ante pönö apäneccä eñëningue mīnitö do entawëmīnīpa.

İnīnque mänīnö nänö ate eñëngainö ante eyepæ entawëmīni inīnque mīnitö nö apänemīni bamīnīpa. ⁶Edæ mönitö, Itota iñömö adocä mönö Codito inongä ingampa, ante apänemöni eñëningue mīnitö Ao äningue, Nawangä impa, ante wede pönëningue waa cæte quëwëmīni acæimpa.

⁷Mänīnö beyæ, Mönö Awënë Itota Codito æyedëno pönīnque edonque pönī a ongonguingä, ante wänö cönīnque mīnitö wæntæye badämaī incæmīnīmpa, ante cædinque Wængongui Önöwoca pönö apäneccä eñëningue mīnitö eyepæ inte waa cæquimīni imīnīpa. ⁸Mīnitö cöwë iinque baganca tæi ongonte oda cædämaī incæmīnīmpa, ante Wængongui pönö cæcä ate mönö Awënë Itota Codito pönëdë mänīñedë ate mīnitö wentamö ædö cæte entawenguimīni. Edæ dæ ampa. ⁹Wængongui, Botö Wengä Itota Codito iñömö mīnitö Awënë inongä ingampa. İnīnque mīnitö tömengä nempo quëwëningue tömengä tönö godongämæ cæte quëwencæmīnīmpa, ante mīnitö imīnīte añete aa pecantapa. Mänömaī ante nē aa pecä iñömö tömengä nänö angainö bai edæ cöwë nē ædæmö cæcä ingampa cæmīnīi.

**Wæætë godö wæætë godö
cædämaī iedäni, ante**

¹⁰Botö tönñäminī, botö mönö Awënë Itota Codito emöwo apänëdingue iīmaī ante ämo eñëmaimīnīpa. Mönö pönencabo imopa, ante adodö pönëningue mīnitö tömämīni

godongämæ Ao ante adodonque cædinque nāwæ godāmaī iedāni. ¹¹ Botō tōniñamini apænebo ēñeedāni. Codoeidi mīnitō īmīnitēdō ante apænedinque, Coodintoidi nāni pōnencabo incæ wæætē godō wæætē godō tedewēnānīpa. ¹² Ante apænedāni ēñēninque botō, Īmaī impa, ante apænebo ēñeedāni. Pancamīniya, “Mōnitō Pabodo nānō nē ēmīñāmōni īmōnīpa,” ante cæmīnīpa. Pancamīniya guiquēnē, “Apodo nānō nē ēmīñāmōni īmōnīpa,” ante cæmīnīpa. Pancamīniya guiquēnē, “Pegodo nānō nē ēmīñāmōni īmōnīpa,” ante cæmīnīpa. Ayæ wæætē pancamīniya guiquēnē, “Codito nānō nē ēmīñāmōni īmōnīpa,” ante cæmīnīpa. Mānōmaīnō ante mīnitō wadō wadō ante tedewēmīni awædō.

¹³ Īñampa Codito nāmā incæ ante dicæ wadō wadō ante apænecantawogaa. Incæte Codito nempo quēwēmīni inte mīnitō, Pabodo ēmīñāmōni īmōnīpa, āmīni. Apodo ēmīñāmōni īmōnīpa, āmīni. Pegodo ēmīñāmōni īmōnīpa, āmīni. Ayæ botō Pabodobo īñōmote wadāni awæ ñænquedīmæ gōnōninque mīnitō beyæ wænōnāni dicæ wæntawogaa. Ayæ botō Pabodobo ēmōwo apænedinque mīnitō dicæ æpænē guiimīnitawogaa. ¹⁴ Botō mīnicabo weca quēwēninque Codipo tōnō Gayo īnate mānīnaque īnate æpænē guidōmo guīdatapa, ante pōnēninque waa tobopa. ¹⁵ Mānōmaī ī adinque mīnitō, Pabodo ēmōwo apænedinque æpænē guītamōnīpa, ante ædō cæte anguīmīniī, ante tobopa.

¹⁶ Æ, tæcæ pōnēmopa. Etepānāidi īnānite adobaī guidōmo guīdānitapa. Wadāni īnānite wabānō guidōmoī, ante wīī pōnēmopa. ¹⁷ Edæ Codito, Bitō æpænē guidōmi guīcædānīpa, ante botō īmote ānāmaī ingacāimpa. Wæætē, Tæī piñængā inte Codito mōnō wædō ante teēmē mongænte ñænquedīmæ wængā beyænque mōnō quēwengæimpa, ante apænebi ēñencædānīpa. Ayæ, Mānīne ante wadāni, Ōnonque impa, ante ānāmaī incædānīpa, ante wæcæ cædinque bitō waodānīque nāni nanguī

ēñente apænedō ante apænedāmaī incæbiimpa. Wæætē, Codito ingantedō ante watapæ apænebi ēñencædānīpa, ānīnque Codito botō īmote da godongā gobo īmopa.

**Codito Wængonguī nānō
ēñēnō entawēninque tæī nānō
piñænō entawengampa**

¹⁸ Itota ingante nāni timpogaiwæ ante apænemōni adinque nē wænguināni guiquēnē, Māniwæ ante apænete wædānitedō abi, ante badete todānīpa. Codito engā beyænque nē quēwēmōni guiquēnē, Codito māniwāa wængā beyænque Wængonguī tæī piñænte pōnō cæcampa, ante wede pōnente apænemōnīpa. ¹⁹ Edæ Wængonguī, Īmaī cæcæboimpa, angampa, ante yewæmonte ongompa.

“Nē adāni ōnonquedō ante ēñēnānīpa,

ante botō nanguī nāni ēñēnō ante wido cæcæboimpa.

Nē nāmā mā pōnente ēñēnāni guiquēnē ōnonque ēñēnānīpa, ante botō nāmā nāni ēñēnō ante Baa ancæboimpa,”

ante Wængonguī cæcampa, ante yewæmongatimpa.

²⁰ Mānōmaī cædinque Wængonguī, Inguipogaque quēwēnāni nāni nanguī ēñēnō incæ ōnonque impa, ante ēñenguēnē quēwēmīni, ante do odōmongampa. Īnīnque adocanque ingante, Nanguī ēñēmīpa, ante Wængonguī dicæ anguingāa. Dodāni nāni wæcæ angainō ante nē nō odōmōmi īmīpa, ante Wængonguī dicæ anguingāa. Nāmā mā pōnēninque nē nō apænebi īmīpa, ante Wængonguī dicæ anguingāa. Edæ dæ ampa. ²¹ Edæ, Inguipogaque quēwēnāni ocaidē nanguī ēñēnāni incæ ōnonque nāni ēñēnō beyænque botō īmote ædō cæte ate bai pōnenguīnāniī, ante Wængonguī nē nō ēñēngā inte cæcampa. Codito nānō cægāinō ante apænemōni adinque īīnāni īñōmō, Ōnonque tedewēnānitedō abi, ante badete todānīpa. Īñampa Codito

nänö cægainö ante badete nani todö beyænque minitö wæætë nè wede pönëmini inte quëwencæminimpa, ante Wængongui nöingä pönëninque pönö cæcampa.

²²Oodeoidi, Öönædë nani mä cæi bai bamönengæ cæmini ate ëñëmaimönipa, ante anewënänipa. Guidiegoidi guiquënë, Nämä mä pönëninque ëñëmaimönipa, ante cædänipa. ²³Mönitö guiquënë, Codito ingante awænëmæ timpote wænönäni wægacäimpa, ante mäninonque ante apænemöni ëñëminipa. Mänömaïnö ante apænemöni ëñëninque oodeoidi guiquënë Baa ante tee tëwate bai oda cædänipa. Guidiegoidi guiquënë mänine ante ëñëninque badete todänipa. ²⁴Mönitö oodeomöni iñömönite minitö guidiegomöni iñömönite ædänimë inänite Wængongui apænte ængä ingaimö inte mönö iñömö edæ iïmai ante pönëmompä. Wængongui nänö nö ëñënö incæ Codito encacampa, Wængongui nänö tæi piñænö incæ Codito entawengampa, ante do edæ ëñente pönëmompä.

²⁵Wængongui önonque ante cæcampa, ante pönëwëminitawoo. Mönö waocabo nangui ëñëmö imompä, ante pönëminitawoo. Iñæmpä, Nangui ëñëmö, ante tedewëmö incæ önonque wædämö inte cæmompä. Wæætë Wængongui guiquënë önonque cæte bai cæcä incæ godömenque gomonga nangui ëñengä inte cæcampa. Ayæ, Wængongui aquïingä inte cæcampa, ante pönëminitawoo. Iñæmpä mönö waocabo tæi piñæmö imompä, ante tedewëmö incæ mönö önonque aquïimö inte cæmompä. Wæætë Wængongui guiquënë nè önonque cæte bai cæcä incæ godömenque gomonga tæi piñængä inte cæcampa.

²⁶Iñänäni, æbänö iñömönite Wængongui aa pecantapa, ante pönëedäni. Tömämöni dicæ nangui ëñëmini ingaminiyaa. Inguipogaque quëwënäni nangui nani encadö bai minitö tömämöni dicæ adobai nangui encamöni ingaminiyaa. Tömämöni dicæ

nangui tæi piñæmini ingaminiyaa. Awënëidi pæingä nänö awënë baquinque ëñacä bai minitö tömämöni dicæ adobai awënë baquinque ëñaminiyaa. Mänömai iñömönite Wængongui dicæ aa pecantawogaa. Incæte adocanque adocanque mänömai iñömönite Wængongui aa pegacäimpa.

²⁷Wæætë, Nè nangui ëñënäni incæ guïñente wæcædänimpa, ante cædinque Wængongui iïmai cægacäimpa. Inguipoga quëwënäni inänite cöwä adinque nè önonque cæi bai cædäni inänite apænte ængacäimpa. Ayæ, Nè tæi piñænäni incæ guïñente wæcædänimpa, ante cædinque Wængongui inguipoga nè wæntæte cædäni inänite apænte ængacäimpa. Inique tömengä mänömai cæcä ate waa cædänipa, ante adinque nè tæi piñænäni wæætë guïñente wædänipa.

²⁸Wængongui inguipoga quëwënäni nani waa pönö mäincoo ewente bai bacæimpa, ante cædinque, Inguipoga pancacooga wiwa incoo impä, ante adinque mänincooque æninque waa cægacäimpa. Ayæ, Önoncooque impä, ante mönö änoncoo adinque tömengä ingante do æninque nö cægacäimpa. Ayæ, Dæ ampa, mönö änoncoo incæ do adinque Wængongui mäincoo æninque nangui cægacäimpa. ²⁹Inique Wængongui weca ongöninque waocä adocanque incæ, Waëmö imopa, ante ædö cæte anguingä.

³⁰Wængongui pönö ængä beyænque minitö Codito Itota nempo quëwëminipa. Wængongui Codito Itota ingante da pönongä æninque mönö Codito nänö ëñënö bai ænte entawëmompä. Tömengä nempo quëwëninque mönö tömengä nänö nö cæte quëwënö bai adobai ænte entawëmompä. Ayæ tömengä tæiyæ waëmö nänö ewocadö adobai pönongä æninque tæiyæ waëmö ewocate quëwëmompä. Ayæ Codito ængä beyænque mönö abæ tawænte gote bai quëwëmompä. ³¹Inique Wængongui beyæ nani yewæmongainö bai iïmai ante bacæimpa. “Waocä, botö nangui

waëmō pōni imopa, ante nāmā waa ate apæneinente wædongā iñōmō tōmengā wæætē, Mōnō Awēnē adocanque waëmō pōni ingampa, ante apæneca iñinque waa cæbaingampa.”

**Itota Codito ingante awāa
timpodāni wængacāimpa, ante**

2 ¹Iñānāni botō mīnitō weca apænecaete ante mā pōninque nē nanguī ēñēnāni nāni waa ēñēnō baī ēñēnāmai imo inte baī pontabopa. Waodāni nāni waa tede baī tededāmai imo incæ pontabopa. Wæætē, Wængonguī nāwangā waa pōni cægacāimpa, ante māniinonque ante apænecaete ante pontabopa. ²Itota Codito ingante do adīmo inte botō, Tōmenganque nānō cægāinonque ante ēñente baī cædinque botō coodintoidi weca gote apænebote, ante godāmai iñedē do ānōmoimpa. Iñinque, Wadō nāni nanguī ēñēnō ante ēñēnāmai inte baī cædinque botō, Itota Codito ingante awāa timpodāni wængacāimpa, ante māniinonque ante ēñente baī gote apænebote, ante pōnēninque mīnitō weca pontabopa. ³Ayæ botō aquīmo pōni iñōmo inte mīnitō weca pōninque, Ædō cæte apænequīmo, ante guīñēnete wædinque nanguī do do wāate pōmo amīnitapa. ⁴Pōninque botō, Mānōmai impa, ante dicæ tōmēmo nanguī ēñēnō ante tedetabogaa. Wængonguī beyæ apænebo ēñēdāni, ante ānīmo incæ botō dicæ waa pōni tedete baī apænetabogaa. Wæætē Wængonguī Ōnōwoca tōnō āawocaque baī ēwocadinque botō tōmengā nānō tæī piñānō beyænque apænebo amīnitapa. ⁵Mānōmai cædinque botō, Waomō mōnō nanguī ēñēnō beyænque ante wīi pōnencæmīnīmpa. Wæætē Wængonguī nānō tæī piñānō beyænque wede pōnēmīni bacæmīnīmpa, ante cæcæte ante mānōmai ponte apænetabopa.

**Wængonguī æbānō ãmongāā,
ante tōmengā Ōnōwoca
odōmongā ēñēmōmpa, ante**

⁶Wæætē ædæmō pōnēnāni æmæwo pæte baī iñōnānite mōnitō tōmēnāni

weca ongōnīnque mōni nanguī ēñēnīnō ante apænemōnīpa. Incæte ñōwodāni nāmā nāni ēñēnō ante apænedāmai imōnīpa. Ayæ imæca awēnēidi nāni dæ goquincabo tōmēnāni nāni ēñēnō ante apænedāmai imōnīpa.

⁷Wæætē Wængonguī awēmō iñonte nānō ēñengainō ante apænemōnīpa. Tōmengā iñōmō, Botō nanguī ēñēnōmo inte pōnō cæbo beyænque botō nē apænte ænānīque ñāo apāite baī entawencædānīmpa, ante inguipoga dæ ānedē wēēñēnedē pōni incæ mōnō imonte ante pōnō cægacāimpa. Incæte, Mānōmai cæcæboimpa, ante tōmengā nānō ēñēnō ante wadāni ēñēnāmai incædānīmpa, ante wææ cædinque wē wodonte baī cædinque tōmengā nānō ēñengainō ante ñōwo ganca awēmō iñōmō entawēnongāimpa. Ñōwo iñōmō tōmengā awēmō nānō ēñengainō ante tæcæ apæneca ēñēnīmōni inte mōnitō wæætē mānīnō ante ñōwo apænemōnīpa. ⁸Inguipoga awēnēidi guiquēnē Wængonguī nānō wē wodonte ēñengainō ante dicæ ēñēnāniyaa. Edæ mānīnō ante ēñente baī tōmēnāni mōnō Awēnē ñāo baī entawēnongā iñongante awāa timpote wænōnāmai incædōnānīmpa. ⁹Wæætē iīmai ante yewæmongatīmpa.

“Botō imote nē waadete pōnēnāni iñōmō watapæ quēwencædānīmpa, ante Wængonguī do pōnō badongacāimpa.

Mānīnō nānō pōnō cægāinō ante waocā dicæ acāa.

Mānīnō ante dicæ ēñengāa.

Edæ waocā nāmanque mā pōnēninque dicæ ēñengāa,”

ante nāni yewæmongāi baī iñinque bacāimpa, ante mōnitō apænemōnīpa.

¹⁰Wængonguī Ōnōwoca guiquēnē tōmāā cōwā adīnque Wængonguī awēmō nānō pōnō badongainō ante edonque adīnque do ēñengampa. Iñinque mōnonga pō guīidīnque tōmengā mōnō imonte edonque odōmongā ēñēmōmpa.

¹¹Edæ mōnō waocabo incæ, Adocanque ōnōwēnēnque pōnēē

cõnongante wacã, Æbãno ante pönëe congää, ante ædõ cæte ëñenguingää. Edæ nê pönëe congã guiquënë, Botõ æbãno ante pönëe cõmoo, ante tõmengã adocanque õnõwënenque pönente ëñengampa. Wængonguï adobai ingampa. Wængonguï æbãno ante awëmõ pönëe congää, ante waocã ædõ cæte ëñenguingää. Wængonguï æbãno ante pönëe congää, ante tõmengã Õnõwoca adocanque ëñëñongã wadãni ëñëñãmai inãnipa. ¹²Wængonguï inõmõ, Botõ æbãno põnõmo æminii, ante edonque acãmĩnĩmpa, ante cædinque tõmengã Õnõwoca ingante da põnongã ænte ewocate amompa. Inĩnque inguipogaque quëwënãni nãni pönëno bai entawënãmai inõmõ inte mõnõ Wængonguï tõmengã Õnõwoca tõnõ äawocaque bai ewocamõ inte do ëñëmompa.

¹³Mõnitõ inõmõ, Wængonguï mãnõmai põnõ cæcampa, ante odõmoncæte ante mã pönente mõni ëñëno ante apãnedãmai imõnipa. Wæætë Wængonguï Õnõwoca põnõ odõmonte apãnecã ëñente ewocadinque tõmengã nãno odõmõnõ mõni ëñëno ante apãnemõnipa. Edæ Wængonguï Õnõwoca nãno pönëno ante ëñencæte ante Wængonguï Õnõwocaque nãno apãnede ante apãnete ëñente ewocacæĩmpa, ante pönëninque mõnitõ mãnĩneque ante apãnemõnipa.

¹⁴Edæ, Wængonguï Õnõwoca nãno pönëno æbãno i, ante tõmengã Õnõwoca tõnõ äawocaque bai nê ewocadãnique pönente ëñëñãnipa. Inĩnque nê õmæwocacã bai ingã guiquënë tõmengã ædõ cæte edonque ëñenguingää. Edæ oda cæcampa. Mãnĩnõ ante apãnemõni ëñëñĩnque tõmengã, Õnonquedõ ante apãnete wæcantedõ abi, ante badete todĩnque edæ, Baa angampa. ¹⁵Wængonguï Õnõwoca tõnõ äawocaque bai nê ewocacã guiquënë, Tõmää æbãno i, ante cõwã adĩnque edonque põni ëñengampa. Wæætë edæ, Tõmengã æbãno ewocacää, ante wadãni cõwã adãni incæte ædõ cæte apænte

anguinãni. ¹⁶Ayæ, “Wængonguï Awënë æbãno nangui ëñente pönengää, ante æcãno ëñenguingää. Edæ Wængonguï ingante godõmenque odõmõnãnipa diyæ ëñente baquingää,” ante yewæmongatĩmpa. Mõnõ guiquënë Codito ëñente nãno pönëno ante entawëmompa.

**Wængonguï ingante nê cæmõ
mõnõ godongãmæ cæcabo**

3 ¹Inãnãni ëñëedãni. Codito Õnõwoca tõnõ nê ædæmõ ewocadãni inãnite botõ Wængonguï Õnõwoca nãno apãnedõ ante do apãnebopa. Mĩnitõ guiquënë mempoga ëñãmĩni inte Codito nempo quëwëmĩni incæ tæcæ ëñadãni bai pædãmai inõmĩni inte mĩnitõ inguipogaque ante pönëmĩni awædõ. Mãnõmai beyæ botõ adobainõ ante ædõ cæte mĩnitõ imĩnite apãnequĩmoo. ²Edæ tæcæ ëñadãni inõmõ tæëmõ mõnõ cænguï capo capo cænãmai inãnipa. Mĩnitõ inõmõ tõmënãni bai adobai imĩni inte Wængonguï Õnõwoca nãno apãnedõ ante ædõ cæte ëñenguimĩni. Inĩnque tæcæ ëñadingã ingante goømæ di godõnete bai cædinque botõ mĩnitõ imĩnite apãnedĩnque adodeque adodeque apãnebo ëñëmĩnitapa. Inãmpa nõwo ganca tæcæ ëñadãni bai inõmĩni inte mĩnitõ æiquedõ ëñenguimĩni. ³Edæ cõwë inguipogaque ante pönëmĩni inte pancamĩniya, Wacã gomonga cæcampa, ante piĩnte wæmĩnipa. Pancamĩniya guiquënë wæætë godõ wæætë godõ piĩnte anewëmĩnipa. Mãnõmai cæte quëwëninque mĩnitõ õmæwocadãni bai imĩni inte inguipogaque ante pönente quëwëmĩni abopa. ⁴Edæ iĩmai ante tedewëmĩnipa. Adocanque, “Botõ Pabodo nãno nê ëmĩñãmo imopa,” ante cæcampa. Wacã, “Botõ guiquënë Apodo nãno nê ëmĩñãmo imopa,” ante cæcampa. Mãnõmainõ ante mĩnitõ õmæwocamĩni inte bai cæmĩni awædõ. ⁵Inãmpa, Apodo æcãno ingää, ante pönëmĩni. Pabodo æcãno ingää, ante

pönēmīni. Edæ botō mōnō Awēnē nānō pōnō anganca tōmengā ingante nē cæbo bagaboimpa. Apodo adobai mōnō Awēnē nānō pōnō anganca Awēnē ingante nē cæcā bagacāimpa. Īnīnque tōmengā beyæ nē cæmōnaque ĩmōna inte mōnatō mīnitō ĩmīnite apānemōna ēñente pōnēmīnitapa. ⁶Tōmēmō minte bai cædīnque botō mā apānebo ate mīnitō tæcæ ēñēmīnitapa. Apodo guiquēnē, Cōñe bate pæcæimpa, ante æpæ gao caadāni bai cædīnque mīnitō ĩmīnite godōmenque nanguī odōmonte apānecā ēñēmīnitapa. Incæte mōnatō apānemōna beyænque ædō cæte tā bocate bai pæwocaquīmīnī. Wængonguī adocanque nē apānecā beyænque mīnitō tā bocate bai pæwocate ēwocamīnīpa. ⁷Īnīnque minte bai nē apānebo inte botō tōnō Apodo æpæ gao cæte bai nē odōmonte apānecā tōnō mōnatō ĩñōmō ōnōmōnaque ĩmōnāpa. Wængonguī tōmenganque, Pæe, ante nē ānongā ingampa. Tōmengā adocanque angā beyænque pæmīnitapa.

⁸Botō nē apānebo tōnō mōnatō, Pæcæimpa, ante āanque bai Wængonguī beyænque cæmōnāpa. Īnīnque botō nē apānebo ĩñōmote tōmengā nē odōmonte apānecā ĩñongante Wængonguī ĩñōmō, Mīnatō apānegaiñō beyæ æeda, ante eyepæ pōñi pōnongā æncæmōnaimpa. ⁹Mōnatō ĩñōmō Wængonguī tōnō godongāmæ cæmōni inte mōni nē cæcabo ĩmōnīpa. Mīnitō guiquēnē Wængonguī quīmīni ĩñōmīni inte tōmengā gōnea bai pæwocamīni ĩmīnīpa.

Ayæ adobai tōmengā nānō mænōincō bai ĩmīnīpa. ¹⁰Nē ēñente mænongā ĩñōmō, Wænōmēnæca ĩnō mænongæimpa, ante cædīnque dicacoo cō cō cæcampa. Botō ĩñōmō Wængonguī waadete pōñō cæcā ate nē ēñente mænongā bai adobai bagaimo inte botō mīnitō weca mā ponte apānebo ēñēmīnitapa. Nōwo guiquēnē botō mænōmaī cō cæte bai mā apānebo ēñēmīni ate wadāni ponte botō cō cædīnca wænōmēnæca mænonte

bai cædīnque godōmenque odōmonte apānedāni ēñēmīnīpa. Īnīnque edæ æcānō mānīnca mænonte bai odōmōna tōmengā tōingā mænonte bai nō ēñente odōmonte apānequēnengā ingampa.

¹¹Wadāni, Dīca adocaa wænōmēnæca ĩnō mænongæimpa, ante tāno nāni cō cædīnca bai Itota Codito adocanque Tānocā ingampa. Īnīnque, Wacā tānocā ingampa, ante bai cædīnque mīnitō ædō cæte wacā mīñæ gomīnī. Īñæmpa, Dīca wacaa wænōmēnæca ĩnō mænonte bai babaimpa.

¹²Ayæ tānoca nāni gō cædīnca bai Itota Codito Tānocā ĩñongante mōnitō, Mānīnca adocaa wænōmēnæca mænongæimpa, ante bai cædīnque odōmonte apānemōnīpa. Nē mænōnāni ĩñōmō oodo ænīnque padata ænīnque dīca nāni waa pōñi adīnca ænīnque, Quīncamē ēwēnāmaī īnguīnca, ante ænīnque tōmēnāni nāni mænōnō bai cædīnque pancamōniya nō pōñi odōmonte apānemōni ate mōnitō apānedō wīdo cædāmaī īngæimpa. Wadāni guiquēnē awæ ænīnque gaguīmæ amīmō ĩ ænīnque ayawāa amīwæ ænīnque quīncoomē ēwēnguīncoo ænīnque godō mænōnāni bai cædīnque tōmēnāni ōnonque odōmonte bai apānedānīpa. ¹³Edæ Wængonguī nānō apānte anguīñōnā ĩnīnque ba ate gonga nāni angā nangūī bæcocæimpa. Māñīñedē ate edæ, Mōnitō æbānō nōwo odōmonte apānemōnīi, ante nāō gongæ edonque acæimpa. Wængonguī māñīñedē mōnitō apānedō apānte ancæte ante cædīnque nē tante bai cæcā ate pancadea æmæwo montæ gōne ate pancadea ongō æncæcāimpa.

¹⁴Īnīnque, Æcānō mænongaincō montæ gōnāmaī ĩ, ante adīnque Wængonguī eyepæ pōnongā ænīnque nē mænongaingā wæætē watapæ quēwencæcāimpa. ¹⁵Wacā guiquēnē tōmengā nānō mænongaincō do montæ gō adīnque Wængonguī māñīncō nē mænongaingā ingante pōñōnāmaī incæcāimpa. Incæte māñīngā waocā gonga bæcōyōmō wodīi tao wīnongā

baí òmæpocä wæyongante Wængonguî ængä beyænque tõmenganque quëwencæcäïmpa.

¹⁶Minitö iñömö, Wængonguî Öñowoca ingante do æninqe tõmengä ingante ëwocamompa, ante ëñënämaí ïminítawo. Wængonguî tæiyæ waëmö oncö baí mönö baö ëñamompa, ante ëñënämaí inte baí cæmini awædö. ¹⁷Wængonguî oncö tæiyæ waëmö oncö ï iñonte waocä bæ tate wido cæcä adinque Wængonguî næëmæ tõmengä ingante edæ ömæe ëwencæcäïmpa. Ayæ adobaí Wængonguî tæiyæ waëmö oncö baí baö ëñayöminite waocä wapiticæ odömonte apænecä beyæ mini godongämæ apænedincabo incæ oda cæte näwæ gomîni adinque në wapiticæ apænecä ingante Wængonguî adobaí wido cæcæcäïmpa.

¹⁸Minitö, Nõwodäni nani ëñënö ante do nangui ëñëmönipa, ante pönëminítawoo. Iñæmpa mänömainö ante minitö nämä babæ pönëwëninque apænemini awædö. Në nö ëñëmîni bacæte ante minitö ñowodäni nani nangui ëñëwëno ante wido cædinque ömæcamini badinque në ëñëmîni bacæminimipa. ¹⁹Inguipogaque quëwënanî nangui ëñënanî incæte Wængonguî, Önonquedö ante ëñëmîni awædö, angampa. Edæ Wængonguî beyæ apænedinque iïmaí ante yewæmongadänimipa. “Ömë nämä nänö ñönömë incæ waocä næëmæ wîni wîni dawacä baí në nangui ëñënanî adobaí nämä nani ëñënö beyænque næëmæ oda cædänipa, ante cæbopa,” Wængonguî angampa. ²⁰Ayæ adobaí, “Në ëñënanî iñömö tõmënanî nani nangui ëñente pönënö incæ idiquibæ impa, ante edæ mönö Awënë do ëñengampa,” ante yewæmonte ongompa.

²¹Îninqe, Botö waocä adocanque nänö në ëmîñæmo inte tobopa, ante änämaí incæminimipa. Iñæmpa mönitö waomîni inte tõmämöni minitö beyæ ante cæte quëwëmönipa. ²²Botö Pabodobo inömo incæ Apodo ingä incæ Pegodo ingä incæ minitö beyæ ante cæte tõmämöni quëwëmönipa. Inguipo

incæ inguipoga ongoncoo incæ minitö beyæ ongompa. Mönö quëwëmämo incæ mönö wænguimämo incæ minitö beyæ ongompa. Nõwopämo incæ miimämo iñcayæ ponguimämo incæ quincoomë incæ edæ minitö beyæ tõmancoo ongompa. ²³Ayæ minitö wæætë Codito beyænque quëwëmîni ïminîpa. Codito wæætë Wængonguî beyænque quëwengä ingampa, ante ämo ëñëmaimînipa.

Itota nänö në da godongaimöni inte iïmaí cæmönipa

4 ¹Îninqe mönatö Pabodobo tõnö Apodo iñömönate minitö iïmaí ante ëñenguënëmîni ïminîpa. Codito tõnö godongämæ cædinque tõmengä beyæ ante Pabodo tõnö Apodo në cæda ïnapa. Ayæ godömenque, Wængonguî tõmengä nänö awëmö ëñengainö ante pönö apænecä ëñëna inte tõmëna mäninö ante në apæneda ïnapa, ante ëñenguënëmîni ïminîpa. ²Îninqe Awënë Wængonguî iïmaí angampa. Botö waocä ingante quïëmë pönö cæbo æninqe tõmengä botö pönönonque entawëninque nö pönente ædæmö aaquënegä ingampa, ante Wængonguî cöwä adinque, Æbänö botö beyæ wææ aabii, ante apænte angampa. ³Îninqe minitö, Pabodo æbänö cæcäa, ante apænte ancæte ante cöwä amîni incæte botö wædämaí imaimopa. Në apænte nani änoncabo incæ botö imote adobaí cöwä adinque apænte änani ëñëninque botö wædämaí imaimopa. Tömëmo incæ, Æbänö botö cöwë wede pönente cæbo imoo, ante ædö cæte nämä anguimoo. ⁴Botö, Tömëmo wënæ wënæ cædämaí inömo imopa, ante pönëmopa. Incæte, Wentamö mongænämaí imopa, ante ædö cæte botö nämä anguimoo. Mönö Awënë adocanque botö imote në apænte angä ingampa.

⁵Mäninö beyæ minitö, Îninqe bayedë tõmäa apænte angæimipa, ante mönö Awënë ponganca ee adinque apænte änämaí ïedäni. Tõmengä iñömö waomö mönö awëmö cægainö ante, Edonque pönî acæimipa, ante ñäö iñömö mäo

odömoncæcäimpa. Ayæ, Æbänö cæcæboimpa, ante mönö önöwënenque pönengainö incæ edonque odömongä gongæ näwæ acæimpa. Ayæ, Adocanque æbänö waa cægacäi, ante, Wacä æbänö waa cægacäi, ante watapæ apænedinque tömämö mönö cægainö ante Wængongui pönö apænecä ëñente mönö tocæimpa.

⁶Ïñänäni ëñeedäni. Waocä adocanque ingante, Waingä ingampa, äninque wacä ingante wii piincæminimpa, ante yewæmongatimpa. Ìninque botö minitö beyæ ante, Mönatö æbänö cæmöna, ante yewæmontabopa. Minitö, Apodo tönö Pabodo æbänö cæda inaa, ante pönëninque Wængongui beyæ näni yewæmongainonque ante mäninonque ëñente cædinque godömenque cædämaï incæminimpa, ante cætabopa. ⁷Ïñampa tömämö önömonque ïñömonte Wængongui, Bitö gomonga waëmömi pönï imipa, ante dicæ apænte angantawogaa. Bitö entawënö ïñömö tömëmi ocaidë mä bitö pönënö beyænque dicæ entawëmitawogaa. Mönö Codito adocanque edæ pönö apænecä ëñente nê ænte entawëmi inömi inte bitö, Tömëmoque nämä beyænque entawëmopa, ante ædö cæte änewëmi.

⁸Minitö, Eyepæ pönï do entawëmönipa, ante bai cæmini awædö. Minitö waa quëwënguinque ante do eyepæ ænte bai cæmini awædö. Edæ Pabodoidi mönitö beyæ cædämaï ïñönänite tömëmöni nämä beyænque awënë odeyemöni bamönipa, ante cæte bai cæmini awædö. Ïñampa minitö näwangä awënë odeyemini bamini bai mönitö adobai awënë odeyemöni badinque nanguï tocædömönimpa. ⁹Wæætë Itota nänö nê da godongaincabo ïñömönite Wængongui incæ, Yæmiñæ pönï gote näni wænguinque godänitedö amini, ante badete tote bai odömongä awædö. Mänömaï cæcä adinque waodäni incæ anquedoidi incæ Wængongui nänö nê badongainäni tömänäni mönitö imönite adinque badete todänipa, ante awædö.

¹⁰Edæ minitö adobai cædinque iïmaï piimini wæmönipa. Mönitö Codito beyæ

cæyömönite minitö, Ocai ömæcamini inte cæminipa, ante pönëminitawoo. Wæætë nämanque ante pönëninque, Codito nempo quëwëninque mönitö ocai encamöni inte nanguï ëñëmönipa, ante tedewëmini awædö. Ayæ, Pabodoidi aquii pönï ïñönänite mönitö wæætë tæëmö piñæmöni imönipa, ante pönëmini awædö. Wadäni adobai minitö iminite ante apænedinque, Waimini pönï iminipa, äninque mönitö imönite ante wæætë, Önöminique iminipa, ante piñänipa.

¹¹Ayæ mönitö ñowo ganca cængui cænämaï inte gue ænente awædö. Tepæ bedämaï inte gæwænte awædö. Weocoo wää tëincoo mongænte awædö. Ayæ tæi tæi pänäni caate wæmönipa. Ayæ oncö ömaamöni inte ¹²mönitö önompoca nanguï cædinque ænte quëwëmönipa. Wënæ wënæ iminipa, ante piñänäni wædinque mönitö wæætë, Minitö iminite Wængongui pönö waadete cæcæcäimpa, ante cæmönipa. Ayæ togænte pänäni ate wædinque mönitö wæætë piñämaï piyænë cæmönipa. ¹³Mönitö imönite ante apænedinque, Wiwa cædänipa töö, ante babæ änäni ëñente wædinque mönitö wæætë waadete apænëmönipa. Edæ, Èwëmöimæ gadonguimæ bai iminipa. Ömæpocoo wido cæquincoo bai iminipa töö, ante piinque inguipogaque quëwënanäni ïñömö mönitö imönite ñowo ganca cöwë wido cædäni wædömöni imönipa.

¹⁴Mönitö beyæ cædinque Pabodoidi wæwente quëwënanipa, ante adinque minitö wæætë guingo imonte wæcæminimpa, ante botö dicæ mänömainö ante yewæmömogaa. Wæætë botö wëmini bai ïñöminite botö, Mänömaï cædinque mini wæquinque impa, ante wææ yewæmömopa. ¹⁵Minitö iminite nê aadäni ïñömö diete miido ganca mänimpodäni ïñönänite mönitö minitö mæmpoidi bai imöni guiquënë mëmönipa pönï imönipa. Edæ, Itota Codito nempo quëwëninque botö, Itota Codito pönö cæcä beyænque mönö watapæ quëwengæimpa, ante apænëbo

ēñēmīnitapa. Mānōmainō ante apānebo ēñēningue mīnitō mēmpoga ēñāmīni ate botō mīnitō mēmpo baī bagaboimpa.

¹⁶Mānōmaī beyæ botō mīnitō īmīnite waadete apānedīnque, Botō mēmpobo cædō baī mīnitō adobaī cæcāmīnimpa, ante nanguī āmopa.

¹⁷Botō tōmāmæ godīnque wayōmō Codito ingante nāni godongāmæ pōnencabo weca wayōmō nāni pōnencabo weca go guīdīnque īīmaī ante apānebopa. Mōnō Itota nempo quēwēningue nō ēñēningue waa cæte quēwengāimpa, ante odōmonte apānebopa. Mānōmainō ante botō odōmonte apānedō baī botō tōmēmo adodō ēñente quēwēmo abaimpa. Īnīnque mīnitō, Pabodo mānōmaī quēwengampa, ante ēñencāmīnimpa, ante botō nē waadecā Tīmoteo ingante da godōmo mīnitō weca ponte apānecæcāimpa. Tōmengā īñōmō botō wengā baī īnongā inte Codito nempo quēwēningue cōwē nō pōnente cæcā ingampa. Tōmengā mīnitō weca ponte apānedīnque, Pabodo nānō odōmonte apānedō baī tōmengā nāmā adodōnque ante cōwē ēñente quēwengampa, ante apānecā ēñēningue adodō ante pōnencāmīnimpa.

¹⁸Pancāmīniya, Pabodo wīī pongā awædō, ante, Tōmēmōnique wæætē nē āmōni incāmōnimpa, ante botō īmote piīnte tedewēmīnīpa. ¹⁹Incæte mōnō Awēnē Ao angā ate botō oo poncæboimpa. Ponte adīnque botō, Tōmēmōnique nē āmōni incāmōnimpa, ante nē tedewēmīni æbānō tedewēmīni, ante ānāmaī incæboimpa. Wæætē adomīni mīni tæī piñænō ante cōwā adīnque apænte ancæboimpa. ²⁰Wængonguī Awēnē Odeye nempo nē quēwēmo īñōmō wīī ōnonque mōnō tedequīnō beyænque quēwēmōmpa. Wæætē edæ tæī piñænte mōnō quēwēnguīnō ante mōnō tōmengā nempo quēwēmōmpa. ²¹Mīnitō æbānō cāmīni ate mīnitō weca ponguīmo. Edæ mīni cædīnō adīnque botō panguēnēmo inguīmo, āmīnitawo. Wæætē waadete

pōnēningue ædæmō cæquēnēmo inguīmo, āmīnitawo.

Nē wīwa towengā ingante apænte angāimpa, ante

5 ¹Edæ, Nē wīwa towengā incæ coodintoidi nāni pōnencabo tōnō godongāmæ ongongampa, ante tededāni ēñentamōnīpa. Mīnitō weca ongongā adocanque tōmengā wæmpo nānōogængā incæ manguīwengampa tōō. Īñæmpa Wængonguī ingante nē ēñēnāmaī īnāni incæ mānōmaī wēnæ wēnæ cædāmaī īñōnāni mīnitō weca ongonganque do cæcā apa cāmīni. ²Nē wīwa towengā tōnō godongāmæ ongōmīni incæte mīnitō, Tōmēmōnique waa cāmōni īmōnīpa, ante tedewēmīni awædō. Incæte Ca ca wāmīni baī waa incædōnimpa. Nē wīwa cæcā ingante, Mōnitō weca ongōnāmaī gobāwe, ante da godōmīni gocā baī waa incædōnimpa. ³Botō guīquēnē nānēnē quēwēmo incæte mīnitō weca owote baī ōnōwēnenque pōnēmo īmopa. Īnīnque mīnitō weca owote baī botō nē wīwa cæcā ingante do apænte āmopa. ⁴Mīnitō Awēnē Itota ēmōwo apānedīnque godongāmæ pōñōmīni botō nānēnē quēwēmo incæte adoyōmō owote baī pōnencæboimpa. Ayæ Awēnē Itota tæī piñænongā inte mīnitō tōnō adoyōmō ongoncæcāimpa. Īnīnque mīnitō īīmaī cædāni. ⁵Awēnē nānō ponguīōnæ īñedē nē wīwa cædongā tōmengā ōnōwoca quēwēncæcāimpa, ante īīmaī cædāni. Tōmengā nānō wīwa ēñayō ēwente bacāimpa, ante cædīnque mīnitō tōmengā ingante Tatāna nempo pædæ godōmīni æncæcāimpa.

⁶Mīnitō, Waa īmōni īmōnīpa, ante tededīnque wīwa tedewēmīnīpa tōō. Edæ dodāni nāni yewæmongainō ante adāmaī inte baī tedewēmīnīpa. “Pāō tōmāo yedæ æmpoquīnque wædænque da wēnāni” baī mīnitō adobaī adocanque wīwa cæcā ingante mīni oda cæquīnque ee amīni ongongampa. ⁷Mīni pōnencabo waēmō pōnī mīni entawēngūnque pāō yedæ æmpoquī wido cæte baī

cædinque nê wīwa cædongā ingante da tadōmīni gocæcāimpa. Edæ mōnō Codito iñōmō wīwa mōnō cædinō ante nā mēnongacæte ante nāmā wepæ godongacāimpa. Edæ dodāni, Nê wænonguēnengā wænōnāmaī inte wodo pænta gocæcāimpa, ante, Patowa, ante codotedo nāni nê wænongaingā bai mōnō Codito iñōmō adobai inongā inte wængacāimpa. ⁸Iñinque mōnō pāo yedæ æmpoqui ōmæmō ī cænte bai cædinque wīwa mōnō cædō ante wido cædinque mōnō piinte cædāmaī inte waa cæte quēwengæimpa. Ayæ ææmæ watapæ bete bai cædinque, Quinō nāwangā pōni ī, ante Ao ante æninqe mōnō nō pōnente quēwengæimpa.

⁹Nê wīwa towēnāni tōnō godongāmæ cædāmaī iedāni, ante botō cadota ante do yewæmōmo aminitawo.

¹⁰Mānōmaīnō ante yewæmōninque botō, Inguipogaque quēwēnāni tōnō godongāmæ cædāmaī iedāni, ante dicæ antabogaa. Iñæmpa wīwa towēnānique, wacā qui nê æinente wædānique, wacā qui nê ō ænānique inguipoga quēwēnānīpa. Ayæ, Wængonguī impa, ante badōninque nê ædæ wæænte quēwēnānique mānimpodānique inguipoga quēwēnānīpa. Iñinque ædō cæte tōmēnāni weca cædāmaī inguī. Edæ inguipo ēmō cæte gote bai tōmēnāni weca ongōnāmaī inguī.

¹¹Wæætē mānīnō ante yewæmōninque botō, Mīni pōnencabo incæ adocanque wīwa cæcā adinque mīnitō tōmengā tōnō godongāmæ cædāmaī iedāni, ante wææ āmopa. Edæ, Nê pōnengā incæ wīwa towengantawo. Nê pōnengā incæ wacā qui æinente wæcantawo. Wængonguī impa, ante badonte nê pōnengā ædæ wæængantawo. Wacā ingante, Wēnæ wēnæ īmīpa, ante angantawo. Tī nāmæ bete nê pōnengā incæ quidi quidi dowængantawo. Wacā qui æncæte ante babæ cædinque ō ængantawo. Iñinque tōmengā, Nê pōnēmo īmopa, ānongā incæ mānōmaī wīwa cæcā adinque mīnitō tōmengā tōnō godongāmæ cædāmaī inte

godōmenque tōmengā tōnō godongāmæ contate cænāmaī iedāni, ante botō wææ ancæte ante āmopa.

¹²Mīnitō Codito nempo mīni quēwencabo incæ nāemæ apænte ānāmaī īmīni inte oda cæmīnīpa. Wadāni inānite Codito nempo quēwēnāmaī iñōnānite botō, Tōmēnāni æbānō wēnæ wēnæ cædānī, ante ædō cæte apænte anguīmoo.

¹³Wængonguinque tōmēnāni inānite apænte ancæcāimpa. Incæte mīni cabo incæ adocanque wīwa cæcā adinque mīnitō tōmēmīni, Mōnitō weca ongōnāmaī gobāwe, ante da tadōmīni tao gocæcāimpa.

Nê pōnēnāmaī ingā apænte ancæcāimpa, ante ānāmaī īe

6 ¹Mīni pōnencabo iñōmīnite adocanque bitō imite wēnæ wēnæ cæcantawo. Iñinque bitō, Tōmengā ingante apænte ancædānīmpa, ante cædinque ēñēnāmaī ināni weca ædō cæte ænte gobii. Wæætē Wængonguī quīnāni inānite angā ēñēninque tōmēnāni wæætē, Tōmengā æbānō wēnæ wēnæ cæcā, ante apænte adinque nō ancædānīmpa. ²Edæ mōnō Wængonguī quīmō iñōmō edæ, Inguipoga tōmāmæ quēwēnāni æbānō wēnæ wēnæ cædānī, ante nê apænte anguīmō īmōmpa. Incæte mīnitō, Mānōmaī cæcæmōnīmpa, ante ēñēnāmaī inte bai cæmīni awædō. Tōmāmæ quēwēnāni inānite nê apænte anguīmīni inte mīnitō nōwo wædænque mīni apænte anguēnēnō incæ quīnante ānāmaī īmīnī. ³Mōnō iñōmō Wængonguī anquedoidi inānite nê apænte anguīmō inōmōīmpa, ante ēñēnāmaī īmīnitawo. Mānīnāni inānite nê apænte anguīmō inōmō inte mōnō pōnencabo nōwo mōnō wædō ante mōnō godōmenque apænte angæīmpa, ante pōnēmīniyaa.

⁴Codito ingante mīni godongāmæ pōnencabo incæ mīni wædō ante apænte ancædānīmpa, ante mīnitō ædānidō inānite āmīni apænte ānānī. Iñæmpa, Ōnōnānique inānīpa, ante

mīni ānōnāni incæ māninō ante nē apænte ānāni badānitawo. ⁵Minitō guingo imonte mīni wæquinque cæmīnīpa, āmo ēñēmaīmīnīpa. Nāna pōnencaya incæ nāēmæ wæætedō wæætē āna wædinque mīnitō, Mōnō pōnencabo incæ æcānō nē nō ēñēnongā inte apænte anguingāā, ante adīnque tōmengā ingante anguēnēmīni imīnīpa. Īñæmpa mīnitō weca nē nō ēñēngā adocanque dæ angantawogaa. ⁶Wæætē nāna pōnencaya incæ nāēmæ pīīnīnque adocanque, Botō beyæ apænte ānīnque īngā ingante pancædānīpa, angampa. Ayæ godōmenque wēnæ wēnæ cædinque tōmengā nānō tōnīñacā ingante nē pōnēnāmaī īnāni weca ænte godīnque, Apænte ānīnque pancæmīnīpa, angā pānānīpa.

⁷Īñæmpa mīni pōnencabo incæ nāēmæ pīīnīnque, Apænte ante pangæīmpa, ante dobæ oda cæmīnīpa tōō. Edæ wacā wīwa cæcā ate wædinque bitō wæætē piyænē cæbi waa īmaīmpa. Tōmengā babæ wapiticæ ānīnque ō ængā wædinque bitō piyænē cæbi waa īmaīmpa. ⁸Incæte piyænē cæquēnēmīni incæ mīnitō wæætē babæ cædinque ō æmīni awædō. Wacā ingante wīwa cæmīni awædō. Mānōmaī cædinque mīnitō mīni pōnencabo incæ wæætē godō wæætē godō wīwa cæmīnīpa tōō.

⁹Wīī ēñēnte cædāni īñōmō Wængonguī Awēnē Odeye nempo cōwē guīdāmaī inguīnāni īnānīpa, ante mīnitō īñōmō ēñēnāmaī inte baī cæmīnīpa tōō. Mānōmaīnō ante pōnēnīnque mīni oda cæquinque ī apa cæmīni. Nōwo godōmenque āmo ēñēedāni. Pancadānīya towente cædānīpa. Pancadānīya guiquēnē, Wængonguī impa, ante nāni badōnīñōmō gāānē ædæ wæænānīpa. Pancadānīya guiquēnē nānōogæ īnāmaī īñongante godō guēa mōwēnānīpa. Pancadānīya guiquēnē nāna onguīñæncaya incæ nāna gæncaya inte baī cædinque guēa monte quēwēnāpa. ¹⁰Pancadānīya guiquēnē awēmō ænānīpa. Pancadānīya guiquēnē

wacā māincoo ante æīnente wædānīpa. Pancadānīya guiquēnē tī nāmæ bete quīdī quīdī dowænānīpa. Pancadānīya guiquēnē wacā ingante, Bitō wēnæ wēnæ īmīpa tōō, ante pīīnīnque babæ ānānīpa. Pancadānīya guiquēnē babæ apænedīnque ō ænānīpa. Mānōmaī wīwa cædōnāni inte tōmēnāni Wængonguī Awēnē Odeye nempo cōwē guīdāmaī inguīnāni īnānīpa, āmo ēñēmaīmīnīpa. ¹¹Mīni pōnencabo incæ pancamīnīya mānōmaī ingaīmīni inte nōwo īñōmō æbānō imīnī. Edæ mōnō Awēnē Itota Codito ēmōwo beyænque Wængonguī Ōnōwoca pōnō nā mēnongacā ate mīnitō tæiyæ waēmō ēwocate quēwēmīni adīnque Wængonguī, Botō ayōmo mīnitō waa cæmīni imīnīpa, angampa.

Baonga quēwēnīnque mōnō tæiyæ waēmō entawente quēwēngæīmpa

¹²“Botō cæīnēnonque ante cæbo incæ Wængonguī wææ ānāmaī ingampa,” ante apænedānīpa. Incæte botō cæīnēnonque ante quēwēmo baī wīī botō waa quēwēngūnque incædōmoīmpa. Botō cæīnēnonque ante cæbo incæ Wængonguī wææ ānāmaī ingampa, ante nāni ānō īñōmō edæ nāwangā impa. Incæte botō cæīnēnonque ante cæbo baī botō nā cæyante baī wæwēngūnēmo inte awædō. ¹³Ayæ cængūī īñōmō. “Mōnō cæncadē guīquīnque cængūī æmōmpa. Ayæ adobaī mōnō cæncadē cæī cængūī beyænque ēnēmōmpa,” āmīnitawo. Īñæmpa cængūī incæ cæīnca incæ, Idæwaa impa, ante Wængonguī wo ēwēncæcāīmpa. Ayæ adobaī mōnō baō īñōmō wīī towēngūnque beyæ ēñamōmpa. Wæætē mōnō Awēnē beyænque mōnō baō ēñate quēwēmōmpa. Ayæ mōnō baō beyæ ante mōnō Awēnē pō guīcā ate tōmengā tōnō āawocaque baī ēwocamōmpa. ¹⁴Īnīnque edæ mōnō Awēnē ingante Wængonguī tæēmō pīñæīnīnque angā nāni ōmæmongā baī mōnō īmonte adobaī tæēmō pīñæīnīnque angā nāni ōmæmongūīmō īmōmpa. ¹⁵Edæ, Codito quī, ante mōnō baō incæ godōmō ængā ate mōnō tōmengā

baö bai eñamompa, ante eñenāmaī iminitawo. Īninqe Codito baö bai eñabo inte botö ĩñömö edæ onquiyængä maincoo beyæ ante nē towente quēwengä tönö edæ ædö cæte godö monguimoo. ¹⁶Edæ, Æcänö mänömaī godö möna tömengä nē tote quēwengä tönö adocanque bai bacampa, ante eñenāmaī iminitawo. Edæ, “Mēnaa ĩnina incæ tömēna wæætē nāna gæncaya möninqe adocanque bai bacædaimpa,” ante apænete yewæmonte ongompa. ¹⁷Ayæ mönö Awēnē nempo quēwengä tömengä ĩñömö mönö Awēnē tönö äawocaque bai ewocacampa cæminii.

¹⁸Æcänö godö towēna tömengä nāmā baö cædingä inte nāmā baö nānō wæwenguinque wēnæ wēnæ cæcampa. Wæætē yabæque mönö wēnæ wēnæ cædö beyæ mönö baö ædö cæte wæwenguii. Mänömaī ĩ ĩninqe mīnitö ĩñömö wodii wīnonte towēnāmaī quēwēedāni. ¹⁹Edæ Wængongui tömengä Tæiyæ Waēmö Önöwoca ingante mīnitonga da pōnongä pō guite owocampa. Īninqe mīnitö, Botö baö tömēmo qui eñabopa, ante ædö cæte äminii. Īñæmpa Wængongui Önöwoca tæiyæ waēmö oncö bai eñate apa anewēmīnii. ²⁰Wængongui nangui pōni godonte ængä beyænque mīnitö baö tömengä qui eñapa. Mänömaī beyæ mīnitö, Tömānāni Wængongui ingante waa ate eñencædānimpā, ante cædinque mīnitö baonga quēwēninqe edæ waa cæedāni.

**Nāna gæncaya ĩñona inte
ĩmaī cæbainapa**

7 ¹Nöwo ĩñömö mīni wædö ante yewæmömīni ænte adinque botö ĩmaī ämopa. Onguiñængä ĩñömö onquiyængä ingante mönāmaī ingä waa tobaimpa. ²Incæte, Wīi towēinente wæcæcäimpa, ante cædinque onguiñænāni tömānāni, Botö nānōogængä incæcäimpa, ante mönāni waa ĩmāimpa. Ayæ onquiyænāni adobaī tömānāni, Botö nānōogængä incæcäimpa, ante mönāni

waa ĩmāimpa. ³Onguiñængä ĩñömö tömengä nānōogængä äñongante, Botö nānōogæmi ĩmipa, ante Ao äninque ääodenque moncæcäimpa. Ayæ onquiyængä adobaī, Botö nānōogæmi ĩmipa, ante äninque tömengä nānōogængä äñongante ääodenque moncæcäimpa. ⁴Monte ate nānōogængä tönö adocanque bai ba adinque onquiyængä wæætē, Onguiñængä qui, ante eñadinque, Tömēmo baonque eñabopa, ante ædö cæte anguingää. Ayæ adobaī onguiñængä wæætē, Onquiyængä qui, ante eñadinque, Tömēmo baonque eñabopa, ante ædö cæte anguingää. ⁵Nānōogængä angä eñente edæ Baa änāmaī. Pancaguēnēa Wængongui ingante nangui apæneccæte ante guēa Ao äninque nānēneto nānēnē wantæ ĩñö möninqe idæwaa. Edæ, Tatāna angä wacā ingante towēinente wæcæ wæ, ante wæcæ cædinque adodē ĩñömö wæætē moncædaimpa.

⁶Incæte mänömaī äninque botö, Mīnitö botö äno bai cōwē cæcæmīnimpā, ante wæcæ änāmaī ĩmopa. Wæætē, Mīnitö mänömaī cæminii waa ĩmāimpa, ante mäninonque ante apænebopa. ⁷Onguiñænāni tömānāni botö bai wēmö cædāni quēwēnāni bai waa incædōnimpā, ante pōnēmpopa. Incæte Wængongui pancadāniya ĩnānite pōnō apænedinque, Bitö mönāmaī ĩntē adobique wēmö cæte botö beyæ cæcæbiimpā, äninque wadāni ĩnānite, Bitö mömi ate mīna gæncaya botö beyæ cæcæmīnāimpā, angampa.

⁸Botö, edēningä ingante apænedinque ayæ owæmpoingä ingante apænedinque, Botö bai wēmö cæbi waa ĩmāimpa, ämopa. ⁹Incæte adocanque, Onquiyængä ingante cōwē moncæboimpā, ante wæcā adinque botö, Bitö cōwē moncæbiimpā, ämopa. Edæ tömengä towēinente wædāmaī incæcäimpa, ante wæcæ äninque botö, Tömēngä godōmenque waa quēwencæcäimpa, ante ee abo moncæcäimpa.

¹⁰Do möningä ingante edæ botö ĩmaī ämopa. Æ, wadö ämopa. Wīi

botō ämopa. Mönō Awënë incæ iīmai angampa. Onquiyængä incæ tömengä nänöögængä ingante emō cæte godāmai incæcäimpa, angampa. ¹¹Incæte emō cæte gocä iñinque wæætē adodō pöninque adocä ingante mongä waa iimaipa. Wæætē adodō pönāmai ingä iñinque tömengä ee quëwëninque wacä ingante cöwë mönāmai incæcäimpa. Ayæ onguiñængä incæ nänöögængä ingante pämänte godāmai incæcäimpa, ante mönō Awënë angampa.

¹²Wamīni imīnite guiqüenē mönō Awënë änāmai iñongä botō wæætē iīmai ämopa. Onguiñæganque nē pönengä inte, Botō nänöögængä pönēnāmai ingä incæ botō tönō ee quëwængampa, ante adinque tömengä nänöögængä ingante pämäñāmai incæcäimpa. ¹³Onquiyænganque nē pönengä inte, Botō nänöögængä pönēnāmai incæ botō tönō ee quëwængampa, ante adinque tömengä nänöögængä ingante pämäñāmai incæcäimpa. ¹⁴Onquiyænganque nē pönengä iñongante tömengä adocanque nänō pönēnō beyænque Wængonguī, Mīna gæncaya botō quimīna imīnāpa, ante onguiñængä ingante edæ do ængampa. Ayæ adobai onguiñæganque nē pönengä iñongante tömengä nänō pönēnō beyænque Wængonguī, Mīna gæncaya botō quimīna imīnāpa, ante onquiyængä ingante adobai do ængampa. Wængonguī mänōmai cæcä beyænque mīnatō wēnāni nāni waa quëwënguīnque Wængonguī quīnāni badānīpa. Wængonguī wīi mänōmai cæcä bai mīnatō wēnāni iñömō Wængonguī quīnāni ināmai inte nōwadāni bai nänēnē pæcædönānīpa.

¹⁵Bitō adobique nē pönēmi iñömīte bitō nänöögængä pämänte gocä wædinque ee abi gocæ. Mänōmai emō cæte gocä adinque bitō tömengä ingante ñänönāmai inte bai badinque ee quëwencæbiimpa. Edæ, Piyænē cæte quëwëedāni, ante Wængonguī tömāmō imonte aa pegacäimpa. ¹⁶Bitō onquiyæmi tömēmi waa cæbi adinque

bitō nänöögængä wabānō waa pönente quëwëmaingä, ante ædō cæte ëñēmīi. Edæ onguiñæmi adobai tömēmi waa cæbi adinque bitō nänöögængä wabānō waa pönente quëwëmaingä, ante ædō cæte ëñēmīi.

¹⁷Incæte mönō Awënë, iīmai cæe, angä ate ëñente wædinque bitō tömengä nänō änōnonque ante cæte quëwencæbiimpa. Ayæ, Æbānō botō nänöögængä ëayōmō mönō Awënë aa pecantapa, ante pönēninque bitō mänīñedē bitō nänöögængä ëagāi bai adobi inte quëwencæbiimpa. Botō iñömō Codito ingante nāni pönencabo wayōmō nāni godongāmæ poncabo wayōmō nāni godongāmæ poncabo weca gote apænedinque, Mänōmai cæedāni, ante tömānāni inānite ante apænebopa.

¹⁸Onguiñæmi imi do ëō togænīmi iñömīte Wængonguī aa pecantawo. Iñinque bitō, Bagäacä bai babote, ante cædāmai incæbiimpa. Eō togæmi inte ee quëwëe. Wæætē ëō togænāmai iñömīte Wængonguī aa pecantawo. Iñinque bagäabi inte ee quëwëe. ¹⁹Edæ ëō togæmō incæ bagäamō incæ waomō önōmonque imōmpa. Wīi mänīnō beyænque waa quëwëmō imōmpa. Wæætē Wængonguī nänō wææ angāinō ëñente beyænque waa quëwëmōmpa. ²⁰Iñinque, Æbānō engæñōmō Wængonguī aa pecantawoo, ante pönēninque bitō adobi inte cöwë quëwëe. ²¹Bitō wacä beyænque cæte nē quëwëmi iñömīte Wængonguī bitō imite aa pecantawo. Iñinque bitō nē cæbi inte piyænē cæte wädāmai incæbiimpa. Incæte bitō imite ñimpo cædinque, Abæ tawænte goe, angä ëñēninque ee goe.

²²Waocä beyænque cæte nē quëwëmi iñömīte mönō Awënë aa pecantawo. Iñinque mönō Awënë incæ pönō ñimpo cædinque, Abæ tawænte goe, angä ëñēninque ee gote bai ëwocabīpa. Wæætē bitō waocä beyænque nē cæbi ināmai iñömīte mönō Awënë aa pecantawo. Iñinque Codito nē aa pete ængä beyænque bitō cæte nē quëwëmi babīpa. ²³Edæ Wængonguī tömengä

nänö Tæiyæ Waëmö Wengä ingante godongä beyænque mönö wæætë tömengä quimö bagamöimpa, ante pönëninque minitö wæætë waocä beyænque në cæte quëwëmini badämaï iedäni. ²⁴Ïñänäni ïïmaï ante cæedäni. Botö Wængongui Awënë nempo quëwëninque tömengä nänö änonque ëñente cæcæboimpa, ante cædinque minitö Wængongui nänö aa peyedë mini ëagai bai adomini inte quëwëedäni.

²⁵Ayæ, Mönämaï inäni æbänö quëwenguëñänäni inäni, ante mönö Awënë angampa diyæ ëñenguimoo. Incæte Wængongui waadete pönö apænecä ëñëninque botö në ëñënömo bagaimo inte mä pönëninque ämo ëñëmaïminipa. ²⁶Mönö wæwenguimämo oo pönï impa, ante pönëninque bitö, Ñöwo botö nänöogængä ingante æbänö ëate quëwëmoo, ante pönëninque ñöwo bitö ëadö bai adobi inte cöwë quëwenguëñëmi imipa, ante pönëmopa. ²⁷Onguïñämi ëñëmi, Bitö nänöogængä ingante do mömitawo. Ìninqe, Pämæncæboimpa, ante änämaï ie. Wæætë wacä ingante ämopa. Bitö wëmö cæbitawo. Ìninqe, Botö nänöogængä, ante diqui diqui minämaï imi waa imaimpa. ²⁸Incæte ñöwo mömi incæ wënæ wënæ cædämaï inte mömipa. Ayæ baquécä adobaï do mongä incæ wënæ wënæ cædämaï inte mongampa. Incæte æcänö möna tömengä inguipoga quëwente nänö caate wæquinque mongampa. Mänömainö ante yewæmöninque botö, Minitö caate wædämaï incæminipa, ante wææ ämopa.

²⁹Ïñänäni, Ñöwopämo wii wantæpiyæ ingäimpa, ante wædinque ämopa. Edëningä nänö pönëno bai në manguiwengä incæ adobaï pönengä bai waa imaimpa. ³⁰Æcänö Ca ca wæda tömengä iñömö wii wæcä bai bacä ininqe waa imaimpa. Æcänö Ca ca toda tömengä wii tocä bai bacä ininqe waa imaimpa. Æcänö godonte æna tömengä ömæpocä bai bacä ininqe waa imaimpa. ³¹Inguipoga mönö cædö ante æcänö

cæda tömengä mäninö ante änämaï inte bai cæcä ininqe waa imaimpa. Edæ inguipoga quëwëninque mönö cædö oo pönï ewente baquinö angüënë.

³²Edæ minitö, Æbänö cæquimoo, ante wædämaï incæminipa, ante botö ïïmaï ante wææ ämopa. Në wëmö cæcä guiquënë, Æbänö cæbo ate mönö Awënë waa toquingä, ante pönëninque tömengä mönö Awënë beyænque ante quëwengampa. ³³Do möingä guiquënë inguipoga nänö quëwenguinö ante pönëninque, Æbänö cæbo ate botö nänöogængä waa toquingä, ante wæcampa. ³⁴Ìninqe tæcæ tæcæ pönente cæcampa. Onquiyængä guiquënë owæmpoingä ingä incæ baquécä ingä incæ mönö Awënë beyæ ante pönëninque, Æbänö botö baö tæiyæ waëmö ëñaquimoo, ayæ, Æbänö botö önöwoca tæiyæ waëmö ëwocaquimoo, ante cæcampa. Do möingä guiquënë, Æbänö cæbo ate botö nänöogængä waa toquingä, ante inguipogaque nänö quëwenguinö ante wæcampa.

³⁵Mäninö ante botö wii minitö iminite wææ cæcæte ante ämopa. Wæætë minitö mini watapæ quëwenguinque ante botö, Mönö Awënë ingante æmæ pönënaïmaï inte nöingä cæte quëwencæminipa, ante ämopa.

³⁶Onguïñængä adocanque guiquënë, Botö wengä baquécä do picængä bacampa, ante adinqe botö tömengä ingante godonguëñëmo imopa, angä ininqe tömengä nänö änö bai cædinque ee godongä moncæcäimpa. Edæ mänömaï godöninque tömengä wii wënæ wënæ cæcä ingampa. ³⁷Wacä guiquënë mimöno ædæmö nö pönëninque, Botö wengä baquécä picængä bacä incæte botö piyænë cæte godönämaï incæboimpa, angampa. Ìninqe wadäni tömengä ingante wææ änämaï iñönäni tömengä, Tömëmoque botö äninö bai cæcæboimpa, ante në ëñente pönëninque godönämaï ingampa. Tömengä adobaï waa cæcampa. ³⁸Ìninqe tömengä wengä baquécä iñongante edæ, Moncæcäimpa, ante

nē godongā guiquēnē waa cæcampa. Wæætē wacā, Mōnāmaī incæcāimpa, ante wīi godongā guiquēnē tōmengā godōmenque waa cæcampa.

³⁹Nānōogængā ayæ mīingā quēwēñongante onquiyængā iñōmō tōmengā tōnō cōwē quēwenguēnengā ingampa. Wæætē nānōogængā wængā owæmpote ate tōmengā abæ tawænte bai adocanque quēwengampa. Do owæmpoingā inte, Wacā ingante mōinēmopa, angā ēñēninqe mīnitō, Tōmēna mōnō Awēnē nempo nāna quēwencaya inapa, ante adinque mōinente nānō wædō ante ee godōmīni moncædaimpa. ⁴⁰Incæte botō, Owæmpoingā ee wēmō cædinque godōmenque watapæ quēwēmaingampa, ante pōnēmopa. Edæ Pabodo imo Wængonguī Ōnōwoca tōnō āawocaque bai ēwocabo inte mānōmainō ante pōnēmopa.

Mōnitō wængonguī cænguī, ante wadāni nāni cōnōni ante

8 ¹Wadāni, Mōnitō wængonguī cænguī impa, ante nāni cōnōnincoo ante adinque mīnitō, Ōnonque cænguī impa, ante abaimpa, āmīnitawo. Nāwangā tōmāmō mīni ānō bai do ēñēmompā. Incæte, Tōmēmoque do ēñēmopa, ante nē angā iñōmō tōmengā nāmā ængō cæte bai cædinque wadāni inānite piinte bai cæcampa. Wæætē nē waadecā guiquēnē wadāni inānite ængō cæte bai cædinque tōmēnāni inānite waadete cæcampa. ²Wacā, Tōmēmo do ēñēmopa, ante nē ānewengā guiquēnē tōmengā nō nānō ēñenguēnēnō ante ayæ ēñēnāmaī inte cæcampa. ³Wæætē Wængonguī ingante nē waadedāni inānite do againgā inte tōmengā tōmēnāni inānite pōnengampa.

⁴Ininque, Mōnitō wængonguī cænguī impa, ante wadāni nāni cōnōnincoo ante ñōwo apænebo ēñēedāni. Tōmēnāni nāni, Mōnitō wængonguī impa, ante nāni cōnōninca ōnoncaque impa, ante mōnō do ēñēmompā. Ayæ adobaī, Nāwā Wængonguī adocanque pōni ingampa,

ante do ēñēmompā. ⁵Wængonguīdi nāni ānōnāni incæ awēnēidi nāni ānōnāni incæ nanguī pōni inānīpa. Nāwangā impa. Incæte tōmēnāni, Wængonguīdi inānīpa, ante nāni ānōnāni inguipoga incæ ōōnædē incæ ongōnāni incæte, ⁶Wængonguī mōnō Wæmpocā iñōmō adocanque pōni ingampa. Ōōnæ incæ inguipo incæ ōōnædē ongoncoo incæ inguipoga ongoncoo incæ tōmancoo incæ tōmengā adocanque badonte aacā beyænque edæ ongoncoopa. Ayæ adobaī mōnō tōmengā nempoque quēwēmompā. Ayæ Itota Codito mōnō Awēnē adocanque pōni ingampa. Tōmengā tōnō godongāmæ cædinque Wængonguī tōmancoo badongacāimpa. Adocā Codito tōnō godongāmæ cædinque Wængonguī pōnō cæcā ate mōnō quēwēmompā.

⁷Māniñō ante pancamonga guiquēnē ēñēmompā. Pancadāniya guiquēnē nē pōnēnāni incæ māniñō ante ēñēnāmaī inānīpa. Iñāni Codito ingante tæcæ pōnēnāni iñōmō tōmēnāni wēēñēñedē, Mōnitō wængonguī impa, ante badonte cōnonte ædæ wæante cægāināni inānīpa. Ñōwo iñōmō tōmēnāni Codito ingante tæcæ pōnente ate, Wadāni wængonguī cænguī incæ cæninque wentamō mongænte wæcæ wæ, ante guīñente wædāni incæte do edæ cænānīpa. Mānōmaī Codito ingante æmæ pōnēnāni inte tōmēnāni wadāni nāni wængonguī cænguī cæninque nāmanque nāni æmæ pōnēnō beyænque nāmā apænte do wentamō entawēnāni inānīpa. ⁸Incæte cænguī ōnonque iñonte mōnō cænāmaī imō beyænque ædō cæte wīwa entawenguiī. Wæætē mōnō cæmō beyænque ædō cæte waa entawenguiī. Edæ mōnō imonte cænguī beyænque Wængonguī dicæ waa aqingāa.

⁹Wængonguī wææ ānāmaī ingā adinque mīnitō do cæmīnitawoo. Iñæmpa mānōmaī cæmīni adinque wadāni nē æmæ pōnēnāni adobaī cænāni ininque tōmēnāni tee tēwate bai oda cæbāinānīpa. Mānōmaī impa, ante pōnēninque mīnitō, Oda cædāmaī incædānīmpa, ante cædinque

ee cænāmaī imāewedāni āmopa.
¹⁰Edæ, Mōnitō wængonguūidi oncō
 impa, ante tōmēnāni nāni ānincōnē
 bitō nē ēñēmi inte go guiddinque
 cængōmitawo. Īñāmpa bitō mǎnōmaī
 go guīi cængōmi adinque wacā nē æmæ
 pōnengā guiquēnē bitō cæbaī adobaī
 do cædinque nāmā apænte ānāmaī inte
 tōmengā nānō oda cæquinque do go
 guīite cæmaingampa. ¹¹Codito tōmāmō
 beyæ wæninqe nē æmæ pōnengā
 beyæ adobaī wængacāimpa cæbii. Bitō
 tōmēnāni nāni wængonguūi oncō ante,
 Ōnonconque impa, ante nē ēñēmi inte
 do guīite cæmi beyænque bitō tōniñacā
 nē æmæ pōnengā iñongante wapiticæ
 māobi oda cæte wæwente bacampa tōō.
¹²Mǎnōmaī cædinque mīnitō tōniñadāni
 iñānite mīnitō waadedāmaī inte wēnæ
 wēnæ cæmīnīpa. Tōmēnāni nāni nāmā
 apænte æmæ pōnēnō ante wido cæte bai
 cædinque mīnitō mōnō Codito ingante
 do wīwa cæmīni imīnīpa. ¹³Iñinque botō
 cæmo beyænque botō tōniñacā oda cæcā
 adinque botō, Tōmengā oda cædāmaī
 incæcāimpa, ante cædinque baō incæ
 cōwē cænāmaī incæboimpa.

**Codito nānō da godongaināni
 iīmaī cæquēnēnāni iñānīpa**

9 ¹Botō Pabodobo æbānō imoo, ante
 mīnitō æbānō ante pōnēmīni. Edæ,
 Botō Itota nānō nē da godongaimo
 imopa. Tōmengā botō imote pōnō
 ñimpo cæcā beyænque quēwēmopa.
 Mōnō Awēnē Itota ingante do agaīmo
 imopa. Mīnitō guiquēnē, Pabodo
 mǎnōmaī ingampa, ante pōnēmīniyaa.
 Ayæ mōnō Awēnē nempo quēwēninque
 botō Pabodobo tōmengā beyæ apænebo
 ēñēmīni inte mīnitō wæætē, Pabodo
 apænecā beyænque mōnitō nē pōnēmōni
 imōnīpa, ante pōnēmīniyaa. ²Wadāni
 guiquēnē, Pabodo ingante Awēnē Itota
 da godōnāmaī ingacāimpa, ānānitawo.
 Tōmēnāni mǎnōmaīnō ante tedewēnāni
 incæte mīnitō guiquēnē, Pabodo
 ingante mōnō Awēnē Itota nāwangā da
 godongacāimpa, ante apænequēnēmīni
 imīnīpa. Edæ botō pōnō apænebo

beyænque mīnitō wede pōnēninque
 mōnō Awēnē nempo quēwēmīnīpa, ante
 edonque abaimpa.

³Pancamīniya botō imote apænte
 ancæte ante cæyōmīni botō nāmā wææ
 cæcæte ante iīmaī āmopa. ⁴Mōnatō
 apænēmōna ēñēmīni incæte mīnitō
 iñōmō, Mīnatō eyepæ cæmīnāpa
 diyæ cænguī tōnō bequī ænguimīnaa,
 ante wææ ante bai tedemīni awædō.
⁵Wadāni mōnō Awēnē Itota nānō nē
 da godongaināni iñōmō nāna gæncaya
 nāna gæncaya godānīpa. Mōnō Awēnē
 tōniñadāni adobaī Pegodo adobaī
 tōmēnāni nāna gæncaya nāna gæncaya
 godānīpa. Mōnatō imōnate guiquēnē
 mīnitō, Mīnatō godinque nānōogængā
 ænāmaī inte goeda, ante wææ
 ante bai tedemīni awædō. ⁶Wadāni
 ōnompoca cædāmaī inte quēwēñōnāni
 botō tōnō Bedēnabee adomōnaque
 ōnompoca mōna cædō beyænque ænte
 quēwenguēnēmōna imōnatawo.

⁷Tontadoidi guiquēnē dicæ
 tōmēnāni nāmā nāni godonte æinta
 beyæ quēwēnāniyaa. Ayæ æcānō
 yowementacoo mingā pæ inca ate nē
 mīningā iñōmō ædō cæte yowepæ ænte
 bedāmaī inguingā. Edæ dobæ ade
 becampa. Cænīnāni nē aacā guiquēnē
 dicæ goōmæ yopænte ænāmaī inguingā.
 Edæ do yopænte ænte becā apa
 ānewēmīnīi.

⁸Mǎnōmaīnō ante apænedinque
 botō waodānique nāni ānōnō ante wīi
 āmopa. Wæætē Wængonguī nānō wææ
 angainō ante mǎnīnonque ante āmopa.
⁹“Wagada onguīñængā nē cæcā inte
 tōmentapo æ yacāimpa, ante āmi pīnā
 pīnā gāwate cægōñongā bitō tōmengā
 ōnōne wææ wodōnedāmaī inte ee
 abi cæncæcāimpa,” ante Mōitee wodi
 wææ yewæmongacāimpa. Īninque
 Wængonguī dicæ wagada beyænque
 ante pōnēninque mǎnōmaīnō ante
 angantawogaa. ¹⁰Wæætē mōnō
 beyænque ante Wængonguī angampa,
 ante pōnengāimpa. Nāwangā mōnō
 beyænque yewæmongatīpa. Waocā
 dicæ, Wadānique cæncædānīpa,

ante onguipoi mangæ mangæ
tænongå. Wæætê, Mönitô godongâmæ
cæncæmönimpa, ante mangæ mangæ
tænongampa. Ayæ tömëmö nê æ
yeyacá guiquënë dicæ, Wadänique
cæncædänimpa, ante æ yeyacá.
Wæætê edæ, Mönitô godongâmæ
cæncæmönimpa, ante pönengä inte
æ yeyacampa. ¹¹ Ìninqe, Minitô
mimöno cænte bai ewocacæminimpa,
ante cædinque mönatô tömëmö minte
pæ bai pönô apænemöna do ëñente
ewocæminitapa. Incæte mönatô ìmönate
wæætê mäincooq pönömîni wënæ
wënæ ænguënëmöna ämînitawo.
¹² Ìnæmpa wadäni ìnänite mäincoo
ee godömîni ænänipa. Mönatô ìñömö
godömenque apænedinque godömenque
ænguënëmöna ìñömönate mînitô Baa
ämînitawoo.

Mönatô nê ænguënëmöna incæte cöwê
ænämaï ìmönapa. Edæ, Mönô Codito
ingantedô ante watapæ apænedinque
mönatô mäincoo æmöna bai wadäni,
Pabodoidi mäincoo æncæte ante
apænedapa, ante pîininqe wææ
ancædönänimpa. Ìninqe, Wææ änämaï
incædänimpa, ante cædinque mönatô,
Cöwê ænämaï incæmönainpa, ante
piyænê cæte ee apænemönapa. ¹³ Näwä
Wængonguï cænguï, ante ænte mämö
cönönäni ongö adinque Wængonguï
oncönê ñænæncönê nê cædäni incæ
pancaæ ænte ade cænte quëwënänipa.
Ayæ, Wængonguï quï, ante baö nâni
iya täimpaa nê cædäni adobaï iya
täimpaa nâni cönöningä incæ pancacäa
ænte cænte quëwënänipa, ante
pönëminiyaa. ¹⁴ Mönô Awënë adobaï,
Botô ìmotedô ante watapæ apænedäni
ate nê ëñänäni wæætê nê apænedäni
ìnänite cænguï pædæ godönäni ænte
cænte quëwencædänimpa, angampa.
¹⁵ Botô guiquënë nê ænguënëmö incæte
cænguï ante änämaï inte cöwê apænebo
inömoimpa. Nöwo mînitô ìmînite
yewæmöninqe botô dicæ, Pönömîni
æncæboimpa, ante yewæmömogaa.
Cænguï ante änämaï inte botô
Wængonguï beyænque apænebo

ëñëmînipa, ante pönëninque mäninö
beyænque tobopa. Mänömainö ante
todömo inte botô, Gäwæante wædinque
näñe wæmo incæ wacä mäincoo edæ
ænämaï incæboimpa.

¹⁶ Itota Codito ingantedô ante apænebi
ëñencædänimpa, angä ëñente botô
nê apænebo bagaimo inte edæ ædö
cæte wadö cæquimoo. Ìninqe botô
mänömainö ante nê apænedömo inte
edæ, Tömëmö waa cædinque apænebopa,
ante ædö cæte tedequimoo. Edæ botô
Itota ingantedô ante möni watapæ
apænedô ante wîi apænebo bai edæ
botô wæquinque incædönimpa. ¹⁷ Edæ
Itota Codito, Apænebi ëñencædänimpa,
angä ëñëninque botô Ao ante
watapæ todinque apænebo adinque
tömengä, Waa cæbi ìmîpa, ante eyepæ
pönongä æmaïmopa. Wæætê, Wîi
apæneinente wæbo incæte botô cöwê
apænebo ìninqe edæ tömengä nänö
angainonque cæte apænebopa. Edæ
botô nê apænequënëmö inte ædö cæte
apænedämaï inguimoo. ¹⁸ Ìninqe
botô ëñente cæbo beyænque quîno
ænguimoo. Botô Itota Codito ingantedô
ante watapæ apænebo beyænque
Wængonguï ìmaï pönö cæcä æninque
tocæboimpa. Botô apænebo beyæ mînitô
nê pönonguënëmîni incæte pönönämaï
imîni ìninqe botô wæætê ænämaï inte
tocæboimpa.

¹⁹ Ayæ waodäni wîi botô awënëidi
ìnänipa. Ayæ botô wacä ingante nê
cæbo ìnämaï inte abæ tawænte bai
quëwëmopa. Incæte botô, Waodäni
godömenque nanguï ìnâni Codito
gämænö poncædänimpa, ante cædinque
tömänäni ìnänite nê cæte quëwëmö bai
botô baquinque nämä pædæ godonte
bai quëwëmopa. ²⁰ Godongâmæ cæbo
ate oodeoidi incæ Itota gämænö
poncædänimpa, ante cædinque botô
oodeoidi nâni pönënö bai pönëninque
tömänäni nâni quëwënö bai quëwëmopa.
Pancadäniya, Möitee wodi nänö wææ
angainö ëñëmö beyænque mönô
quëwengæimpa, ante pönëninque
mäninonque ante ëñente cædänipa.

Botō guiquēnē, Wīi Mōitee wodi nānō wææ angainō ēñēmō beyænque mōnō quēwengæimpa, ante pōnēmopa. Incæte, Godongāmæ cæbo ate mǎnīnonque ante nē ēñente cædāni adobaī Itota Codito gāmænō poncædānimpa, ante cædinque botō tōmēnāni ēñēnō baī adobaī ēñente baī cæbopa.

²¹Wadāni guiquēnē Mōitee wodi wææ ante nānō yewæmongainta adāmaī īnānīpa. Botō guiquēnē, Wængonguī, Īīmaī cædāni, ante nānō wææ angainō ante cōwē ēñenguēnēmo inte botō mōnō Awēnē Codito nempo quēwēninque tōmēngā nānō angainō ante cōwē ēñente quēwēmopa. Incæte godongāmæ cæbo ate nē adāmaī īnāni adobaī Itota Codito gāmænō poncædānimpa, ante cædinque botō wadō pōnēmo incæ tōmēnāni adāmaī inte nāni quēwēnō baī adobaī inte baī quēwēmopa. ²²Ayæ, Godongāmæ cæbo ate æmæ pōnēnāni adobaī Codito gāmænō poncædānimpa, ante cædinque botō tōmēnāni æmæ pōnente quēwēnāni baī æmæ pōnēmo inte baī quēwēmopa. Īninque, Godongāmæ cæbo ate pancadāniya Codito gāmænō ponte quēwencædānimpa, ante cæcæte ante botō æbānō cæquimoo, ante wædinque īīmaī cæbopa. Wadāni nāni quēwēnō baī wadāni nāni quēwēnō baī adobaī cædinque botō tōmānāni nāni quēwēnō baī adodō ante pōnēmo inte baī quēwēmopa. ²³Edæ, Itota Codito watapæ pōnō cæcā beyænque tōmāmō tōmēngā nempo quēwēninque godongāmæ watapæ tocæimpa, ante cædinque mǎnīnō wadāni nāni quēwēnō baī wadāni nāni quēwēnō adodō ante pōnēmo inte baī quēwēmopa.

²⁴Edæ nē quingæ pogodo godāni īñōmō tōmēnāni nāni pogodo goīmancadē tōmānāni pogodo godānīpa. Incæte adocanque quingæ pogodo gocā inte tāno gote næ gongængā adinque edæ, Bitō adobique quingæ pogodo gote gānā cæbīpa, ante pædæ pōnōnāni ængampa, amīnitawoo. Mīnitō guiquēnē quingæ pogodo gote baī gānā cæte

æncæte ante tæī pīñænte cædāni.

²⁵Gānā cæcæimpa, ante cædinque tōmēnāni wadō nāni cæinēnō ante cædāmaī inte wæntæye īnāmaī inte mǎnīnonque ante cædānīpa. Tōmēnāni guiquēnē gānā cædinque poganta aquīī guīñē wænguīñabo nāni que cædīntaque ænte wencæcæte ante mǎnōmaī cædānīpa. Mōnō guiquēnē poganta guīñē wænāmaī inta mōnō cōwē encaquinta æncæte ante mǎnōmaī cæmōmpa. ²⁶Mǎnōmaī impa, ante pōnēninque edæ wīñatæ wīñatæ guīdāmaī inte pogodo godāni baī botō tōingā gobopa. Ayæ, Æcānō gānā cæcāā, ante tiyæmāa tamonte guēa cæda baī cædinque botō, Gānā cæcæboimpa, ante tæīmō pīñænte nō cæbopa. ²⁷Īninque godōmenque godōmenque apænebo ēñēnāni ate tōmēmo oda cædāmaī incæboimpa, ante cædinque botō, Tæī pīñænte quingæ gobāwe, ante baī cædinque botō nāmā incæ da godō da godō godoncæte ante nāmā tæi tæi pante baī cæbopa.

Wængonguī impa, ante nāni cōnōninca

10 ¹Botō tōnīñamīni īīmaī ante apænebo ēñēedāni. Mōnō wæmæīdi wodi tōmānāni boguīmā gāñēñōmō quēwente cægongadānimpa. Ayæ tōmānāni gāwapæntibæde tæcæguedēmæ ti wææ tao gogadānimpa. ²Īninque æpænē guiite baī cædinque tōmēnāni Mōitee wodi nempo tōmānāni nāni quēwenguinque edæ boguīmāmodē godinque gāwapæntibæ tæcæguidēmæ gogadānimpa. ³Ayæ cænguī Wængonguī öñæde da pōnongā wææ nāni cæ baī tōmēngā Öñowoca nānō apænedō adobaī ēñente ewocate quēwengadānimpa. ⁴Wængonguī Öñowoca apænecā ēñēninque tōmānāni godongāmæ bete baī ewocate quēwengadānimpa. Edæ dicabo tæēmonca īñonte Mōitee wodi ongonto tæi tæi āayongā æpæ ompade ba begadānimpa. Īncayæ Ponguingā mōnō Codito adobaī tæī pīñængōā inte tōmēnāni tōnō godongāmæ godinque

tömengä Önöwoca ingante pönongä æninque tömënäni ompade bete bai äawocaque bai ewocagadänimpa.

⁵Incæte wodo tömänäni ëñënämaï cædäni adinque Wængongui wii togacäimpa. Edæ piïninque wænöninque önömæca yabæque wido cæcä ñömængadänimpa.

⁶Ïninque, Tömënäni wænæ wænæ cæcæte ante nani toinente wædö bai minitö wii adobaï toinente wæcæminimpa, ante mönö ïmonte wææ odömoncæte ante Wængongui tömënäni nani toinënö beyæ ante pangä wængadänimpa, ante abaimpa. ⁷Pancadäniya nani badonte cönöinca weca ædæ wæænte, Wængongui impa, ante babæ apænete towengadänimpa. Edæ, “Cæncæte ante becæte ante tæ contadinque tömënäni Yæ yæ owempocæte ante ængæ gantidänitapa,” ante yewæmongatimpa cæminii. Minitö ïñömö edæ, Wængongui impa, ante nani babæ towengai bai wii adobaï cædäni. ⁸Pancadäniya guiquënë nänöogængä inämaï ïñongante wiwa towengadänimpa. Edæ bæintitodee miido ganca inäni mänimpodäni edæ mänömaï towënäni inte adoönæque ïñonte näñe wængadänimpa, ante adinque pönente wædinque mönö wæætë towënämaï ingæimpa. ⁹Pancadäniya guiquënë, Quiëmë cæmö ïñömonte Awënë dicæ pangäa, ante anca wænæ wænæ cædäni adinque Wængongui tæntæ angä pocæ wængadänimpa. Ïninque tömënäni nani wænæ wænæ cægainö ante mönö Baa ante wænæ wænæ cædämaï ingæimpa. ¹⁰Pancadäniya guiquënë Wængongui nänö pönöincoo adinque, Wængongui wii waëmö pönongä awædö, ante piïnte tededäni ate Wængongui anquedo në wido cædongä inongä inte tömënäni inänite wænonte edæ wido cægacäimpa. Mänömaï cæcä ante adinque minitö, Pangä wæncaæ wæ, ante wædinque tömënäni nani piïnte tedewengai bai adobaï piïnte tededämaï imæwedäni.

¹¹Ïninque, Wamini mini adobaï panguinque cæminipa, ante wææ

odömoncæte ante pancadäniya inänite Wængongui mänömaï pangacäimpa. Ayæ ïimämo wodo ïinque bayonte quëwëmö ïñömonte dodäni mönö ïmonte wææ ancæte ante yewæmöninque, Wænæ wænæ cædäni ate Wængongui æbänö pangacäi, ante aedäni, ante wææ yewæmongadänimpa. ¹²Mänömaï impa, ante adimini incæte minitö, Mönitö nämä ongonte cöwë oda cædämaï incæmönimpa, ante pönëminitawo. Edæ mini ædocæ tæ go wæænguinque mänömaï ænewëminipa töö. ¹³Minitö wænæ wænæ cæinente wæminitawo. Edæ wii minitö adomnique mänömaï wænæ wænæ cæinente wæminipa. Mönö waocabo mönö wænæ wænæ cæinente wæcabo tömämö ïmompä. Incæte minitö mini oda cæquinque wænæ wænæ cæinente wæmini adinque Wængongui mönö ïmonte cöwë në pönengä inongä inte, Oda cædämaï incæminimpa, ante wææ æninque edæ, Idæwaa, angampa. Ayæ wænæ wænæ cæinente wæmini incæte tömengä töö æmænte ængä beyænque minitö eyepæ inte ate adiyæ næ gongæninque oda cædämaï inguimini iminipa.

¹⁴Mäninö beyænque botö në waademini, ämo ëñeedäni. Wængongui impa, ante nani babæ ante gönöinca gomö adinque ocæmæ wodii winöedäni ämopa. ¹⁵Minitö ocäi encadömini iminipa, ante adinque botö mänömainö ante yewæmömopa. Ïninque botö änö ante, Nö intawo, babæ intawo, ante minitö në encadömini inte apænte ante bai ëñencæminimpa. ¹⁶Mönö pönencabo owæta æninque Wængongui ingante waa ate pönente apænedinque, Mönö Codito wepæ tömämö beyæ godonte impa, ante pönëninque mönö pönencabo ïñömö godongämæ bemompä. Ayæ päö mönö pä ænö æninque, Mönö Codito tönö godongämæ caate wængaimö bai ïmompä, ante pönëninque mönö godongämæ cæmompä. ¹⁷Mönö päö adocaque æninque pä ænte godongämæ cæninque mönö, Päö adocaque i bai mönö tæiyæmö pönö ïmö incæte adocabomö ïmompä, ante pönengæimpa.

¹⁸Idægoidi ēnagaināni iñōmō,
Wængonguī quī, ante baō ænte māmō
ñōnōninge iya tǎnānīpa. Mānīī baō
tōmēnāni nāni iya tāimpaa ñōnōningā
pancacāa ænīnque tōmēnāni, Baō
Wængonguī quī ī baī mōnō adobaī
Wængonguī quīmō īmōmpa, ante baī
cædinque godongāmæ cænānīpa, ante
do ēñēmīnīpa. ¹⁹Mānōmaī ānīnque
botō æbānō āmoo, ante pōnēmīni. Nē
ēñēnāmaī īnāni nāni babæ cōnōnīca
iñōmō edæ nāwā Wængonguī ingampa
diyæ tōmēnāni tōmēngā quīnāni
īnāniyaa. Ayæ, Wængonguī cænguī impa,
ante babæ nāni ānongā iñōmō nāwā
Wængonguī cænguī impa diyæ tōmēnāni
Wængonguī tōnō godongāmæ cænāniyaa.
Botō iñōmō edæ mānōmaīnō ante dicæ
āmogaa.

²⁰Mānōmaī ānāmaī īmo inte botō
īīmaī āmopa. Tōmēnāni, Wængonguī
quī, ante babæ cōnōnīnque dicæ nāwā
Wængonguī ingante godōnānīpa.
Iñæmpa wēnæidi īnānīte godōnānīpa
cæmīnīi. Wēnæ tōnō cædāni awædō,
ante mīnitō gomō adīnque godongāmæ
cænāmaī īmāewedāni, āmopa. ²¹Edæ
mōnō Awēnē bepæ godongāmæ bemīni
inte mīnitō wēnæidi bepæ ædō cæte
godongāmæ bequīmīnīi. Mōnō Awēnē
cæimpaa tæ contate godongāmæ cæmīnī
inte mīnitō wēnæidi cæimpaa ædō cæte
godongāmæ tæ contate cænguīmīnīi.

²²Æmæ pōnente baī wēnæidi nāni
bepæ bemō adīnque mōnō Awēnē piīnte
badīnque pāmaīngampa, ante ēñēnīmō
inte mōnō ædō cæte wēnæidi bepæ
bequīmō. Tæī piñænte wææ cæmōmpa
mōnō Awēnē pānāmaī inguingāā.

**Ñī cæyænte gote baī quēwente
waadete pōnengæimpā**

²³Mīnitō īīmaī apænedīnque,
“Mōnō quīēmē baī cæinēmo incæ
Wængonguī wææ ānāmaī ingampa,”
āmīnitawo. Iñæmpa mōnō cæinēnonque
cæte quēwēmō baī wīī mōnō waa
quēwēngūnque incædōnīmpa. Ayæ
adobaī, “Mōnō cæinonque cæmō
incæ Wængonguī wææ ānāmaī

ingampa,” āmīnitawo. Iñæmpa mōnō
cæinēnonque cæte quēwēmō baī
wacā, Botō adobaī cæbote, ante oda
cæcædongāimpā cæmō. Oda cædāmaī
incæcāimpā, ante wææ cædinque mōnō
Wængonguī nānō ānōnonque ante
ēñente cæcæimpā. ²⁴Edæ, Mōnō æbānō
cæte eyepæ ænīnque quēwēngūīmō,
ante nāmā beyænque wædāmaī inte
wæætē wadāni beyæ ante pōnēnīnque,
Tōmēnāni nōingā ante ēñente waa
quēwēncædānīmpa, ante mōnō nanguī
cæcæimpā.

²⁵Īnīnque baō godonte æncæte ante nē
mānāni nāni æī pancadē gote ænīnque
mīnitō mīmō entawēmīni incæte, Baacā
baī intawo, nāwāaquinā intawo, ante
apænte ānāmaī inte guīñēnedāmaī ade
cæedāni. ²⁶Edæ, Inguīpo Wængonguī
quī impa. Īnīnque inguīpoga ongoncoo
tōmancoo adobaī Wængonguī quī inte
nāwāaquincoo impa, ante yewæmongatīī
apa guīñēwēmīnīi.

²⁷Ayæ nē pōnēnāmaī ingā mīnitō
īmīnīte, Pō cæedāni, angā ēñēnīnque
mīnitō goīnēmīni inte godīnque tæ
contayōmīni cænguī pædæ pōnongā
adīnque ee ō ænte cæedāni. Baacā
intawo, Nāwāaquinā intawo, ante
nāmanque apænte ānāmaī inte ade
cæedāni. ²⁸Wæætē wacā tōmēngā nānō
mīmō pōnēnō beyænque ante wææ
ānīnque, “Wadāni tōmēnāni, Mōnītō
wængonguī cænguī impa, ante do
nāni godōnī impa iñæmpa cæmīnīi,”
angantawo. Mānōmaīnō wææ angā
ēñente wædinque mīnitō nē wææ āningā
beyæ ante ayæ tōmēngā nānō nāmā
apænte æmæ pōnēnō beyæ ante edæ
cænāmaī īedāni. Iñæmpa inguīpo incæ
inguīpoga ongoncoo tōmancoo incæ
mōnō Awēnē quī impa cæmīnīi. ²⁹Wīī
tōmēmīnī mīmō entawēnō beyæ ante
nāmā apænte ānīnque wæætē nē wææ
āningā beyæ ante tōmēngā nānō nāmā
apænte æmæ pōnēnō beyænque ante
mīnitō cænāmaī incæmīnīmpa.

Incæte bitō wabi īīmaī ante wæbitawo.
“Mōitee wodi nānō wææ angāinō beyæ
ñā cæyænte wægaīmo baī inte botō

ñōwo ñi cæyænte gote bai imo adinque wacā tömengä nänö nämä apænte æmæ pönönö beyænque ædö cæte botö imote apænte anguingää,” ante wæbitawoo.

³⁰Ayæ, “Wængongui önonque pönongä æninqe botö tömengä ingante waa ate pönente apænedinque ade cæmo adinque wadäni iñömö edæ, Baacä incæ iñæmpa cæmii, ante quinante pönö babæ ante tedewänanii,” ante bitö wæbitawoo. ³¹Incæte minitö cæmïni incæ bemïni incæ quïemë bai cæmïni incæ minitö cædinö adinque wadäni, Wængongui ñäö apâte bai ëmönongä ingampa, ante acædänimpa, ante cædinque waa cæedäni. ³²Edæ minitö iñömö, Waa cæmöni adinque wadäni oodeoidi incæ guidiegoidi incæ Codito ingante nê godongämæ pönëinäni incæ tömänäni tee tewardämaï inte oda cædämaï incædänimpa, ante pönëninque edæ waa cæedäni. ³³Botö adobaï, Botö tömëmo ænguïnö ante wædämaï imopa. Wæætë, Botö waa cæbo adinque wadäni Itota gämænö pöninque tömengä ængä beyænque quëwencædänimpa, ante pönëninque botö quïemë cæbo incæ cöwë waa cæbopa.

11 ¹Mönö Codito tömengä nänö cæï bai botö adobaï cæbo adinque minitö botö cæï bai adobaï cæbaiminipa.

**Ïmaï cæte Wængongui
ingante apænecæïmpa**

²Minitö botö imote cöwë pönëmïni adinque botö minitö iminite waa adinque apænebopa. Ayæ do pönengainäni nani apænegaïnö ante botö adodö ante apænëbo ëñëninque minitö, Näwangä impa, ante ëñente cæminipa, ante adinque botö minitö iminite waa ate pönëninque apænëbopa.

³Ñōwo iñömö ïmaï ämo ëñëedäni. Mönö Codito ñænængä inongä inte onguiñængä ingante nê angä ingampa. Woda näna gæncaya adinque onguiñængä ñænængä bai inongä inte onquiyængä ingante nê angä ingampa. Mæmpo Wængongui guiquënë ñænængä pönï inongä inte mönö Codito

ingante nê angä ingampa. ⁴Ïninqe onguiñængä iñömö Wængongui ingante apænedinque ayæ, Wængongui æbänö angää, ante apænedinque wencadämaï apænecæcäïmpa. Edæ bee ocadinque tömengä nämä ocabo ante guïñencate bai apænëbaingampa.

⁵Onquiyængä guiquënë bee ocadinque Wængongui beyæ apænecæcäïmpa. Bee ocadinque tömengä, Wængongui æbänö angää, ante apænecæcäïmpa. Edæ bee ocadämaï inte nämä ocamö ante guïñencate bai onquiyængä apænëbaingampa. Mänömaï cædinque tömengä nê ëñënämaï cædingä ingante nani ëö tocadingä bai inongä inte encabaingampa. ⁶Edæ onquiyængä bee ocadämaï ingä inte godömenque ëö tocacä bai waa incædönimpa. Wæætë, Eö tocate wæcæ wæ, ante wæcä ïninqe tömengä iñömö edæ bee ocabaingampa. ⁷Edæ onguiñængä ingante badöninque Wængongui tömengä nänö ëmönö bai adobaï badongä ëmongacäïmpa. Ïninqe Wængongui nänö ñäö apäidö bai adobaï ëmönongä inte onguiñængä bee ocadämaï incæcäïmpa. Onquiyængä guiquënë onguiñængä nänö ëmönö mäninque ëmönongä ingampa.

⁸Onguiñængä ingante täno badöninque Wængongui ayæ onquiyængä ingante badoncæte ante onguiñængä iyapa ænte badongacäïmpa. ⁹Edæ wïi onquiyængä beyæ ante onguiñængä ingante Wængongui badongacäïmpa. Wæætë, Bitö onguiñængä beyæ quëwencæbiimpa, ante onquiyængä ingante badongacäïmpa. ¹⁰Ïninqe onquiyængä iñömö, Botö nänöogængä beyæ Wængongui botö imote badongacäïmpa, ante pönente wædinque bee ocacæcäïmpa. Ayæ, Bee ocabo adinque Wængongui anquedoidi incæ, Botö nänöogængä nê angä ingampa, ante ëñencædänimpa, ante cædinque onquiyængä waa cædinque bee ocacæcäïmpa.

¹¹Incæte mönö Awënë nempo quëwëninque onguiñængä dæ angä bai onquiyængä önonganque baquëngainö

anguënë. Wæætē onquiyængä dæ angä bai onguifængä wæætē önonganque baquëngainö anguënë.

¹²Edæ onquiyængä ayæ dæ äñongante tömengä ingante badoncæte ante Wængonguif onguifængä iyapa æninque badongacäimpa. Wæætē wëñængä onguifængä ingante onquiyængä mangä beyænque ëñacampa. Incæte Wængonguif beyænque tömämö quëwëmompa.

¹³Onquiyængä bee ocadämäi inte Wængonguif ingante apænecä ïninque waa intawö, ante minitö tömëmini godongämæ pönëë cöninque äedäni. ¹⁴Edæ dodäni näni cægäi bai cæquënemö inte mönö iïmai ante pönengäëimpa. Onguifængä doyænguif encadinque guifëncate wæquëngä ingampa, ante edonque ate pönëmaimpa. ¹⁵Onquiyængä guiquënë tömengä doyænguif pæ ïninque edæ waa impa. Edæ, Doyænguif bee ocacæbiimpa, ante onquiyængä ingante Wængonguif badongä encacampa. ¹⁶Botö mänömainö ante apænebo ëñëninque minitö pancaminiya wæætëdö wæætë äinëminitawo. Ìñæmpa botö äninö bai mönitö cöwë cæmönipa. Ayæ Codito ingante godongämæ näni pönencabo adobai Wængonguif quinäni ïnönäni inte edæ cöwë mänömai cædänipa cæminii.

**Awënë äëmäë ante bedinque
pancaminiya wiwa cæmini**

¹⁷Minitö mini waa quëwënguinque ante godongämæ ponguënemini incæte mini godömenque wiwa quëwënguinque godongämæ pömini awædö. Ìninque botö, Waa cæminipa, ante ædö cæte anguimoo. ¹⁸Iïmainö ante ñöwo täno apænebo ëñëedäni. Codito ingante mini pönencabo godongämæ pöninque minitö iñömö mini caipæ incæ wæætë godö wæætë godö tedewëninque wacabo nänënë wacabo nänënë baminiya. Ante apænedäni ëñëninque botö, Wabänö nöingä ante apænedänipa, ante pönëmopa. ¹⁹Nawangä impa, ante pönëmopa. Edæ, Ædänidö ïnänite Wængonguif waa acää, ante edonque

acäëimpa, ante tömengä angä ate minitö mini cabo wadö ante mini cabo wadö ante tedeminiya, ante awædö.

²⁰Ìninque, Awënë äëmäë impa, ante godongämæ pöninque minitö wiwi mönö Awënë äëmäë bete bai cæmini awædö.

²¹Edæ mini godongämæ cæñedë incæ minitö, Wadäni adobai cæncädänimpa, ante ee ongönämai imini inte tömämäni cænguif ade cæminipa. Pancadäniya ayæ gæwænte ongönönäni edæ pancaminiya do tömo bete dowænte wæmini awædö.

²²Ìñæmpa oncö ömaamini bai inte minitö tömëmini oncönë cænte wiwi bemini. Edæ Codito ingante mönö godongämæ pönencabo Wængonguif quimö imö incæte minitö näëmæ püinte cæmini awædö. Ömæpodäni incæ tömënanäni näni guingo imonte wæquinque ante minitö pæ gompote ade cæminipa töö. Mänömai cæmini adinque botö dicæ, Waa cæminipa, ämogaa.

Mönö Awënë äëmäë

*(Mäateo 26.26-29; Mäadoco
14.22-25; Odoca 22.14-20)*

²³Edæ mönö Awënë botö imote pönö apænecä ëñëninque botö wæætë iïmai ante minitö iminite pönö apænëtabopa. Mönö Awënë Itota ingante Codaa nänö odömonte godongäionæ woyowotæ iñonte Itota päö æninque, ²⁴Wængonguif ingante waa ate pönente apænedinque päö pä æninque angacäimpa. “Ïi päö botö baö bai impa. Botö, Minitö quëwëncæminipa, ante botö baö godonte bai cædinque wæncæboimpa. Botö pä ænte pædæ pönömo bai minitö adobai iincayæ ate botö imote ante pönëninque godongämæ cæedäni,” angantapa.

²⁵Mänömai angä iinque cænäni ate owæta adobai æninque tömengä, “Botö wepæ iimæ bai impa. Wængonguif do apænedinque, Botö pönö cæbo ate minitö Ao ämini ïninque mönö godongämæ waa cæte quëwëngäëimpa, angacäimpa. Nöwo adobai miine äninque apænebopa. Botö wepæ ante Ao

ante æmīni inte mōnō godongāmæ waa cæte quēwengæimpa. Īnīnque mīnitō wantæ wantæ iñō bedīnque botō ĩmote ante pōnente becæmīnīmpa.” Ante Itota angā begadānīmpa. ²⁶Īnīnque Itota nānō ponguīōnæ ganca mīnitō mǎnōmaī pǎo wæætē wæætē cæninque mǎnīmæ baī wæætē wæætē bedīnque, Mōnō Awēnē tōmāmō beyæ wængacāimpa, ante odōmonte baī cæmīni adīnque wadāni ēñencædānīmpa.

**Nōingā ante pōnēnīnque mōnō
Awēnē ææmā becæimpa**

²⁷Mǎnōmaī ī ĩnīnque waocā pōnēnāmaī inte mōnō Awēnē pǎo ōnonque cæninque Awēnē nānō bequīmæ ōnonque bedīnque tōmengā nānō wentamō mongænguīnque mōnō Awēnē baō ante, Ōnonque ĩmpa, ante piīnte baī cædinque tōmengā wepæ ōnonque wido cæte baī cæcampa. ²⁸Īnīnque, Æbānō entawēmō, ante mīnitō nāmā nǎēmænte cōwā adīnque nōingā ante pōnēnīnque pǎo cæninque mǎnīmæ bequēnēmīni ĩmīnīpa. ²⁹Edæ, Mōnō Awēnē baō baī ĩmpa, ante æcānō pōnēnāmaī inte cænte beda iñōmō tōmengā nāmā nānō apænte pante wæquinque mǎnōmaī cænte becampa. ³⁰Edæ mǎnōmaī cæmīni beyænque pancamīniya aquīīmīni badīnque wæntæye baminīpa. Pancamīniya wīī pōnente wæmīnīpa. Ayæ wadāni æpodānimē mǎnīnō beyænque do æmæwo wænānīmpa.

³¹Incæte mōnō cōwā adīnque nāmanque apænte ānīnque nōingā cæmō ĩnīnque mōnō Awēnē wæætē mōnō ĩmote apænte ante piīnāmaī ĩmaingampa. ³²Mōnō Awēnē mīnitō ĩmīnite apænte ante piingantawo. Edæ mōnō Awēnē, Inguipogaque quēwēnāni ĩnānite apænte ānīnque botō pǎñedē mīnitō wīī adobaī pante wæquīmīni, ante wææ cædinque ñōwo iñōmō edæ, Ēñenguēnē quēwēedāni, ante wædænque pangā wæmōmpa.

³³Botō tōnīñāmīni ēñēedāni. Mǎnōmaī ī, ante pōnēnīnque mīnitō

cæncæte ante pōnīnque ee ongōñōmīni tōmānāni adoyōmō pōnāni ate godongāmæ cæedāni. ³⁴Godongāmæ pōnīnque mōnō wīī apænte panguēnēmō bacæimpa, ante wææ cædinque mīnitō nē gæwænte wæcā ingante āmīni oncōnē tāno cæncæcāimpa. Nōwo mǎnīnque ante yewæmōnīnque botō mīnitō weca iīncayæ ate pōnīnque wadō mīni ānīnō ante godōmenque apænebo ēñencæmīnīmpa.

**Wængonguī Ōnōwoca pōnō
cæcā ænīnque cæcæimpa**

12 ¹Īñānāni ēñēedāni. Wængonguī Ōnōwoca mōnō ĩmote pōnō cæcā ate tōmengā nānō pōnōnoncoo eyepæ ænte ewocadīnque mōnō æbānō cæquīī, ante ēñēnīnque mīnitō oda cædāmaī incæmīnīmpa, ante ñōwo yewæmōmo aedāni.

²Doyedē iñōmō mīnitō ēñēnāmaī iñōmīnite wadāni, Mōnitō mīñæ pōedāni, ante æbāmē cæte ænte māodāni gogamīnīmpa. Tōmēnāni mīñæ mǎnōmaī go go cædinque mīnitō do oda cædinque babetade nāni badōnīnca weca ædæ wæænīnque, Mōnitō wængonguī ĩmpa, ante cædinque quēwengamīnīmpa. ³Īnīnque mīnitō ĩmīnite botō ñōwo, Ēñenguēnē quēwēmīni, ante iīmaī ante apænebopa. Æcānō Wængonguī Ōnōwoca tōnō āawocaque baī ewocacā guiquēnē tōmengā, Itota nānō panguīnque nē wentamō mongængā ingampa, ante ædō cæte tedewengūngāā. Ayæ wæætē Wængonguī Tæiyæ Waēmō Ōnōwoca tōnō ewocadāmaī ingā guiquēnē tōmengā, Itota Tæiyæ Awēnē ingampa, ante ædō cæte apænequīngāā.

⁴Adocanque ingante wadō pōnō cædinque Wængonguī Ōnōwoca wacā ingante wadō pōnō cædinque tōmengā nānō pōnōnīncoo nēnempote baī cæcā ænīnque mōnō wadō wadō nē cæmō ĩmōmpa. Wængonguī Ōnōwoca adocanque pōnī ĩnongā incæ mǎnōmaī wadō wadō pōnō cæcampa. ⁵Ayæ mōnō Awēnē adocanque pōnī ĩnongā

inte waocä adocanque ingante, Ìimai cæe, äninque wacä ingante, Wadö bai cæe, angä ëñëninque mönö tömämö wadö wadö nê cæmö ïmompä. ⁶Ayæ Wængonguï adobaï adocanque pönï incæ täï piñængä ïnogä inte waocä adocanque ingante pönö cæcä äninque tömengä täï piñængä badinque inte wadö cæcampa. Wacä ingante wadö pönö cæcä äninque tömengä täï piñængä badinque wadö wadö cæcampa. Ìininque Wængonguï mänömai wadö wadö pönö cæcä äninque mönö tömämö eyepæ badinque cæmompä.

⁷Wængonguï Önöwoca, Tömänäni waa quëwencädänimpa, ante cæedäni, ante tömämö ïmonte wadö wadö pönö odömonte apænecä ëñëninque tömämö mönö waa quëwenguinque ante godongämæ cæmompä.

⁸Ìinque Wængonguï Önöwoca pancadäniya inänite, Wængonguï nö nänö ëñënö ante apænecä ëñëninque tömënäni nê nö ante apænedäni badäniya. Ayæ adocä Önöwoca ïñömö Wængonguï nänö cædö ante edonque odömongä adinque pancadäniya nê adinäni badinque, Wængonguï mänömai cæcampa, ante nö apænedäniya.

⁹Adocä Wængonguï Önöwoca apænecä ëñëninque pancadäniya, Wængonguï eyepæ pönö cæcampa, ante wede pönënanäni inte tömënäni wede nänö pönënö beyænque nanguï cædäniya. Ayæ Wængonguï Önöwoca adocanque ïnogä inte pönö cæcä äninque pancadäniya wënæ wënæ inäni inänite gampote apænedäni ate waa badäniya. ¹⁰Pancadäniya inänite guiquënë Wængonguï Önöwoca godö cæcä äninque tömënäni täï piñænäni badinque nanguï pönï cædäniya. Wængonguï Önöwoca apænecä ëñëninque wadäni Wængonguï beyæ nê apænedäni inäniya. Ayæ wacä yewænte bai tedecä adinque, Wængonguï Önöwoca tedecantawo, wënæ tedecantawo, ante wæyönäni Wængonguï Önöwoca pancadäniya inänite edonque odömongä adinque

tömënäni, Æcänö önöwoca nê tedecä, ante do ëñënäniya. Pancadäniya guiquënë Wængonguï Önöwoca tönö apænedinque wadäni nänö tede bai nê tededäni inäniya. Ayæ ïinäni wadäni nänö tede bai tededäni ëñëninque pancadäniya Wængonguï Önöwoca apænecä ëñëninque, Nê tededäni æbänö ante tededäni, ante do ëñënäni inte wadäni inänite edonque pönï apænedäni ëñënäniya.

¹¹Ìinque adocä Önöwoca adocanque ïnogä inte tömengä nänö nö angä bai cædinque mönö ïmonte apænte äninque, Pancaminiya ïimai cæcæminimpa, wamini ïimai cæcæminimpa, ante pönö cæcä äninque adocanque nänö cæquënëno ante wacä nänö cæquënëno ante edæ tömämö mönö cæquënëno ante cæmompä.

Adocabomö bai ïmompä

¹²Mönö baö adoyonque pönï ëñamö incæ mönö wiï adodonque cæquinö ante ëñamö inte mönö pæ pagænguincöo watai watai ëñamompä. Edæ wadö mönö cæquinö ante watai ëñadinque mönö wæætë wadö cæquinö ante watai watai ëñamompä. Ìinque watai watai nanguï mönö ëñacoo ïñömö adoyonque pönï impä. Ayæ Codito nempo quëwëninque mönö adobaï adocabomö ïmompä. ¹³Mönö adocabomö mönö tömämö baquinque Wængonguï Önöwoca mönonga pö guiite owocampa. Ìinque oodeocä incæ guidiegocä incæ wacä ingante nê cæcä incæ abæ tawænte ee gote bai nämä beyænque nê cæcä incæ mönö tömämö adotaca bete bai Wængonguï Önöwoca tönö äawoacque bai tömämö ewocamompä.

¹⁴Mönö baö adoyonque pönï ëñamö incæ mönö wiï adodonque cæquinö ante ëñamö inte mönö ëñacoo watai watai nanguï ëñamompä. ¹⁵Ìinque mönö önöwa incæ, “Önompö ömæpobo inte botö waocä baö ömaabo ïmopa,” ante ædö cæte anguingä. Ìñæmpä mänömai wæte tedecä incæ önöwa cöwë waocä baö ëñate ewacampa. ¹⁶Ayæ mönö

önömonca incæ, “Awınca ömæmómo inte botö waocä baö ömaabo ïmopa,” ante ædö cæte anguingä. Ìñæmpa mänömaï ante tedecä incæ önömonca cöwë waocä baö ëñate ëmoncacampa. ¹⁷Ìñæmpa mönö baö tömäñö awincaque ëmómö bai edæ quimocadö ëñenguëñëi. Ëñënamäi incädömöimpa. Ayæ mönö baö tömäñö önömoncaque ëmoncamö bai quincadodö ongoncadoquëñëi.

¹⁸Incæte Wængongui ïñömö edæ, Waomïni mïni cæquëñënö ante eyepæ cæcæmïnimpa, ante badoncæboimpa, ante Wængongui angacäimpa. Ìninqe tömengä nämä nänö angainö bai badöninque mönö pæ pagænguincöo adoyonque baquinque ante wadö cæquïnö ante wadö cæquïnö ante tömäñö badongacäimpa. ¹⁹Edæ adodonque pönï mönö cæquëñënö ante Wængongui badongä bai mönö wadö mönö cæquëñënö ante quïodö pæ pagænte cæquëñëi. ²⁰Wængongui nänö në badongaimö ïñömö inte wadö mönö cæquïnö ante watai nanguï mönö ëñacoo ëñamö incæ mönö baö adoyonque pönï ëñamompa.

²¹Mänömaï ëñamö ïñömönte edæ mönö awınca incæ önömpo inte apænedinque, “Bitö dæ ämi bai botö tömëmo eyepæ cæcædömoimpa,” ante ædö cæte anguiï. Ayæ wæætë mönö ocamö incæ önöwa inte apænedinque, “Bitö dæ ämi bai botö tömëmo eyepæ cæcædömoimpa,” ante ædö cæte anguiï. ²²Wæætë mönö baö pancayonga pæ pagænämaï ï incæte mänïñö ante mönö godömenque waa adinque, Mönö quëwenguïñö impa, ante angæimpa. ²³Wayö guiquëñë, Wïi waëmongä awædö, ante mönö añö ante, Waa acædänimpa, ante cædinque waëmoncoo pönö dadi ompogate mänïñö beyæ godömenque waa ate bai cæmompä. Wayö guiquëñë mönö guiñëñate wædö ante, Wïi edonque acæimpa, ante pönö bee ogate cædinque mönö guiñëñayö beyæ godömenque waa cæmompä. ²⁴Waëmö mönö ayö guiquëñë, Edonque acæimpa, ante bee ogadämaï cæmompä.

Incæte, Adoyonque bacæimpa, ante mönö baö wayö wayö badöninque Wængongui, Wïi waëmongä, ante mönö wæyö ante pönëninque, Mänïñö botö godömenque waa abopa, ante badongacäimpa. ²⁵Ìninqe, Mïnitö baoncoo näëmæ pïñämaï incæmïnimpa, ante cædinque Wængongui mönö baö adoyonque badongacäimpa. Wæætë mïnitö nämä baoncoo incæ näëmæ waadete waa cæcæmïnimpa, äninque Wængongui tömäñö waa acampa. ²⁶Ìninqe mönö baö adoyömonque nantate wæyömö tömäo wootæ wootæ nantate wæmompä. Ayæ wæætë adoyömonque adinque, Waëmö impa, änäni ëñente wædinque tömäo watapæ tomompä.

²⁷Mïnitö ïñömö, Wayö wayö ëñamö incæ adoyonque ëñamompä, ante do pönëninque, Mönö adobai nänëñë nänëñë ingaimö inte ñöwo wæætë Codito nempo quëwëninque adocabomö imompä, ante pönencæmïnimpa. ²⁸Ìninqe Codito ingante godongämæ mönö pönencabo ïmö adinque Wængongui angä ëñëninque ïimai cæmompä. Yæcadomöni ïmöni ïñömö Codito nänö da godongaimöni ïmöni. Gao wæi ïnäni ïñömö Wængongui beyæ në apænedäni ïnäni. Ayæ tæcæguedëñäni ïnäni ïñömö në odömönte apænedäni ïnäni. Wæænömenque ïnäni ïñömö tæi pïñænte entawente në nanguï cædäni ïnäni. Yæmïñæ gao æidinque ïnäni ïñömö Wængongui Önöwoca tönö ääwocaque bai ëwocadinque ïmaï cædäni. Pancadäniya, Wënæ wënæ ïnäni waa bacædänimpa, ante në waa cædäni ïnäni. Pancadäniya wadäni beyæ në waa cædäni ïnäni. Pancadäniya në änäni ïñöñäni inte awëñëidi ïnäni. Ayæ yæmïñæ pönï ïnäni ïñömö wadäni nänï tede bai në tededäni ïnäni.

²⁹Mänömaï ïmö incæte edæ Codito nänö në da godongaimö dicæ tömämö ïmongaa. Ayæ Wængongui beyæ në apæñëimö dicæ tömämö ïmongaa. Në odömönömö dicæ tömämö ïmongaa.

Nē tæi pīnænte entawente nanguī cædōmō dicæ tōmāmō imongaa. ³⁰Ayæ Wængonguī Awēnē pōnō cæcā incæte wēnæ wēnæ ināni nāni waa baquinque ante dicæ tōmāmō nē waa cæmongaa. Edæ wadāni nāni tede baī dicæ tōmāmō tedemongaa. Wacā mænōmaī wadāni nāni tede baī tedecā ēñēninqe tōmāmō dicæ mōnō tededō adodō edonque apænemongaa. ³¹Incæte mīnitō Wængonguī ingante, Bitō Ōnōwoca pōnō cæcā ate mōnitō eyepæ inte ate yæcado ongōnāni nāni cæi baī adobaī cæcæte ante nanguī wæmōnīpa, ante apænedinqe nanguī cæedāni.

**Mōnō waadete pōnente
cæcæimpa, ante**

Ōnōwō iñōmō botō, Æbānō godōmenque waa pōni cæquī, ante yewæmonte odōmōmo aedāni.

13 ¹Botō waodāni nāni tede baī tedebopa, amīnitawo. Wængonguī anquedoidi nāni tede baī tedebopa, ante tomīnitawo. Iñæmpa mōnō wadāni inānite waadedāmaī inte tedemō ininqe ampoincade ōnonque ampoi baī imaimpa. Waadedāmaī inte tedemō ininqe adoyōmō pōnō wo pōnō wo pōnō wæcainta baī mōnō adobaī ōnonque tedewēmō imaimpompa.

²Wængonguī Ōnōwoca pōnongā æninqe botō tōmengā beyæ nē apænebo imopa, ante tomīnitawo. Waodāni nāni wē wodonte ēñengainō tōmānō ante edonque pōni ate ēñēmopa, ante tomīnitawo. Waodāni nāni nanguī ēñēnō ante adinqe tōmānō ante ēñēmopa, ante tomīnitawo. Edæ nē wede pōnēmīni inte mīnitō ānanquidi incæ amīni ēñente cabænte gotawo. Iñæmpa mænīnō tōmānō waa pōni cæmō incæ mōnō wadāni inānite waadedāmaī inte cæmō ininqe wæætē ōnōmonque edæ mōnō babaimpa.

³Ōmæpodāni inānite botō mænīnō tōmānō waa pōni cæmō incæ mōnō wadāni inānite waadedāmaī inte cæmō ininqe wæætē ōnōmonque edæ mōnō babaimpa.

botō piyænē cæbaīmopa, ante mīnitō, Waa cæbopa, ante tomīnitawo. Iñæmpa mænīi tōmānō waa cædinque mōnō waadedāmaī inte cæmō ininqe mōnō waa cædō beyæ ænāmaī imaimpompa.

⁴Nē waadete pōnengā iñōmō tōmengā pīnāmaī inte edæ piyænē cædinque godō waadete cæcampa. Wadāni gomonga cædinque godōmenque nanguī ænāni adinqe nē waadecā wæætē waadete pōnēninqe pīnte wædāmaī inte piyænē cæcampa. Nāmā nānō cædinō ante pōnēninqe nē waadete pōnengā iñōmō, Botō gomonga cæbopa, ante tededāmaī ingampa. Tōmēmoque wæmō imopa, ante nāmā waa adāmaī ingampa. ⁵Wacā tæcæ cæyongante nē waadete pōnengā iñōmō, Tāno cæbote, ante wæcæ cædāmaī ingampa. Nāmā nānō æinēnō ante cædāmaī inte tōmengā wadāni beyænque cæcampa. Wæætē wīi iñontobæ ænguī bacampa. Wadāni wēnæ wēnæ cædāni ate wædinque tōmengā nē waadecā inongā inte wæætē piyænē cæcampa.

⁶Ininqe, Wacā wēnæ wēnæ cæcampa, ante tededāni ēñente wædinque nē waadete pōnengā iñōmō mænīnō ante todāmaī ingampa. Wæætē, Wacā nōingā cæcampa, ante tededāni ēñēninqe tōmengā watapæ pōni tocampa. ⁷Æbāmē cædāni incæ nē waadete pōnengā iñōmō piyænē cædinque tōmānāni inānite wæcæ gompompa. Wæætē, Waa cædānīpa, ānāni ēñēninqe tōmengā, Nāwangā impa, ante do ēñēngampa. Æbāmē ba incæte tōmengā, Ayæ ate watapæ bacæimpa, ante cōwē pōnēninqe wæntædāmaī inte ee cæcampa.

⁸Mōnō waadete pōnēmāmo iñōmō cōwē dæ badāmaī ingæimpa. Wæætē Wængonguī iincayæ ate, Idæwaa, angā ininqe inguīpoga tōmengā beyæ mōnō apænedō guiquēnē edæ dæ angæimpa. Wadāni nāni tede baī mōnō tededō incæ pæ wēnecæimpa. Inguīpoga nanguī adinqe mōnō ēñēnō ante Wængonguī, Idæwaa, ancæcæimpa. ⁹Nōwō mōnō ēñēnō iñōmō pancaā ēñēninqe pancaā

wæætē oda cæmompā. Wængonguī beyæ mōnō apænedō iñōmō pancaā apænedinque māninque apænemompā.
¹⁰Iñique bayedē guiquēnē Wængonguī nānō apænedō ædæmō ēñēninque mōnō nōingā pōnī odōmonte apæneccæmōimpa. Oda cæte mōnō ēñēnō ante, Idæwaa, āninque Wængonguī māniñedē edæ mōnō wīī eyepæ apænete wædō ante, Idæwaa, ancæcæimpa.

¹¹Botō iñōmō wēñæmoyedē wēñængā nānō tede bai tededinque wēñængā nānō ocai ēñēnō bai ēñengaimo inte wēñængā, Īimai impa, ante nānō pōnēnō bai botō māniñedē adobai pōnengaboimpa. Nōwo guiquēnē picæmo badinque wēñæmoyedē botō cægainō ante ñimpo cæbopa. ¹²Awocawænta wēmō ate bai cædinque mōnō ñōwo Wængonguī Ōnōwoca nānō odōmōnō ante edæ wīī edonque amompā. Ayæ ate guiquēnē mōnō awincadō awinca edonque pōnī acæimpa. Botō ñōwo pancaā adinque oda cæte ēñēmo ĩmopa. Ayæ ate guiquēnē Wængonguī pōnō odōmongā adinque tōmengā botō ĩmote edonque pōnī acā bai botō adobai tōmāā eyepæ pōnī acæboimpa.

¹³Iñique mōnō entawēnoncoo ante adinque mēnonque go adodonque mānimpodonque ayæ ongompā. Mōnō wede pōnēnō ante ædæmō entawengæimpa. Watapæ bacæimpa, ante mōnō pōnēnō ante ædæmō entawengæimpa. Mōnō waadete pōnēnō ante ædæmō entawengæimpa. Īinque mānimpodonque ayæ ongō incæte mōnō waadete pōnēnō iñōmō edæ ñænænō pōnī ĩ ĩinque mōnō māninō ante tāno ædæmō entawengæimpa.

**Wadāni nāni tede bai
æbānō tedequīī, ante**

14 ¹Iñique mīnitō, Nē waadete pōnēmō bacæimpa, ante māninonque ante pogodo gote bai nangui cæedāni. Ayæ adobai, Wængonguī Ōnōwoca mōnō ĩmonte nānō pōnōnō bai mōnō eyepæ ēwocadinque cæcæimpa, ante nangui

æinente wæedāni. Māninō Wængonguī Ōnōwoca nānō pōnōnoncoo ate adinque mīnitō, Wængonguī beyæ nē apænemō mōnō tāno adodonque ante bacæimpa, ante godōmenque æinente wædinque cæedāni. ²Edæ wadāni nāni tede bai æcānō tededā tōmengā wīī waodāni ĩnānite apæneccampā. Wængonguinque ingante apæneccampā. Edæ tōmengā ōnōwocaque tedecā ĩinque tōmengā ingante Wængonguī æbānō awēmō apæneccā, ante ædō cæte ēñenguīnānī. ³Wængonguī beyæ nē apæneccā guiquēnē waodāni ĩnānite waadete pōnēninque ĩimai cæcæte ante apæneccā ēñēnānīpa. Mīnitō tæī pīñæmīni mīni entawenguinque wede pōnencæmīnīmpā, ante apæneccampā. Ayæ, Wæwente quēwēmīni incæ mīnitō wampo bawēnente tæī pīñænte cōwē cæcæmīnīmpā, ante tōmengā Wængonguī beyæ ante pōnō apæneccampā. ⁴Wadāni nāni tede bai nē tedecā guiquēnē, Tōmēmo tæī pīñæmo botō entawenguinque ante nangui ēñencæboimpa, ante nāmā beyænque ante tedecampā. Wængonguī beyæ nē apæneccā guiquēnē Codito ingante nāni godongāmæ pōnencabo beyæ ante apænedinque, Mīnitō tæī pīñænte mīni entawenguinque ēñencæmīnīmpā, ante apæneccampā.

⁵Iñique mīnitō tōmāmīni wadāni nāni tede bai apænemīni adinque botō wædænque tobaīmopa. Wæætē tōmāmīni Wængonguī beyæ apænemīni adinque botō godōmenque watapæ tobaīmopa. Wængonguī beyæ nē apæneccā iñōmō ñænængā ĩñongā wacā tededō nē tedecā guiquēnē wædangā ingampā. Incæte, Codito ingante mīni godongāmæ pōnencabo tæī pīñænte entawencæmīnīmpā, ante cædinque tōmengā wacā tededō tedete ate, Īimai ante tedetabopa, ante mīnitō tededō adodō ante edonque apæneccā ĩinque tōmengā adobai ñænængā ĩnongā ĩmaingampā. ⁶Īñānāni ēñēedāni. Wængonguī nānō nō wōdōnō incæ tōmengā nānō nō ēñēnō incæ tōmengā

nänö nö odömönö incæ ante botö minitö weca pöninque odömönte apænebo ëñëninque minitö godömenque pönëmaimînîpa. Wængonguî iîmaî cæcæcäimpa, ante apænebo ëñëninque minitö guiñente wædinque waa cæbaimînîpa. Wæætë minitö weca pöninque botö wadâni nâni tedebai tedete apænebo bai minitö ædö cæte godömenque nê pönëminî baquënëminîi.

⁷Edæ gobæ ongönte aa pedinque önonque ante pedâni ëñëninque mönö wæætë, Ædemë ante pedânîpa, ante ædö cæte ëñenguîi. Nê ampoinca ampodâni adobai ämotamîni inâmaî önonquedö ante ampodâni ëñëninque mönö, Ædemë ante ampodânîpa, ante ædö cæte ëñenguîi. ⁸Ayæ tontado adobai, Wæætedö wæætë cæcæimpa, ante todompeta nâni ancadeca we ööninque idiquibæ we öongä ininque wadâni, Æbämë cæcæte ante we öongää, ante wædinque oda cæte ee ongönte wæætedö wæætë cædämaî îmaînanîpa. ⁹Ayæ mîni cabo adobai wîi edonque apænemîni ëñëninque wadâni, Æbämë ante tedecää, ante wædinque oda cæte wæbainânîpa. Woboyæ mämoque iñæmpa tedewëmaimînîpa.

¹⁰Wadâni inguipoga tömäö quëwëninque nanguî nâni tededoncoo tededânîpa. Nâwangä impa. Incæte wadâni nâni tededö wadâni nâni tededö tömäö tedequinö i ininque adodeque incæ önonque tedete inâmaî impa.

¹¹Ininque wacä apænecä ëñëninque botö, Æbänö ante tedecää, ante ëñënamâi îmo adinque tömengä wæætë, Wabi inte wîi ëñëmîpa, ancædongäimpa. Tömengä ingante botö adobai, Wabi inte botö tededö wîi tedebîpa, ante ancædömoimpa. ¹²Ininque minitö, Wængonguî Önöwoca pönö cæcä æninque mönö eyepæ ewocadinque cæcæimpa, ämînitawo. Mänömainö äninque minitö, Wængonguî Önöwoca pönö cæcä ænte ewocadinque cædömö inte mönö Codito ingante mönö godongämæ pönencabo godömenque tæi piñænte entawengæimpa, ante

pönëninque minitö, Mäninonque ante botö ewocate cæquînö ante pönongä æncæboimpa, ante täno æinente cæedâni.

¹³Mänömaî beyæ wadâni nâni tede bai nê tedemîni iñömö minitö tönîñadâni adobai ëñencædânîmpa, ante cædinque Wængonguî ingante iîmaî ante æedâni. Wængonguî ëñëmi. Wadâni nâni tede bai do tededinque botö æbänö ante tedetawoo, ante bitö odömönte apænebi ëñëmoë. Mänömainö ante apænebi ëñëninque botö wæætë mönitö tededö adodö ante edonque apænebo ëñëninque minitö Wængonguî ingante apænete cæedâni. ¹⁴Wadâni nâni tede bai tededinque Wængonguî ingante apænebo inte botö önöwocaque pönente apænedinque ocâi ömædæcabo bai inte apænebaîmopa.

¹⁵Mänömaî impa, ante adinque æbänö cæquîmoo. Edæ önöwoca pönente apænedinque botö ocâi adobai ëñente pönëninque Wængonguî ingante apænecæboimpa. Ayæ Wængonguî ingante waa pönî apænecæte ante önöwoca pönente ämotamîni äninque adobai ocâi ëñente pönëninque ämotamîni ancæboimpa. ¹⁶Bitö, Wængonguî ingante waa pönî cæcampa, ante önöwocaque pönëninque apænebitawoo. Iñæmpa Wængonguî ingante waa ate pönëninque önöwocaque pönente apænebi ëñëninque wacä nê önonganque ingä guiquënë, Bitö æbänö apænebi, ante ëñënamâi inte, Ædö cæte Ao anguîmoo, ante wæbaingampa. ¹⁷Bitö waa ate pönëninque önöwocaque waa apænebi ëñëninque tömengä wæætë, Bitö æbänö ancæte ante tedebîi, ante ëñënamâi inte ædö cæte godömenque tæi piñænte entawengüingää. ¹⁸Botö iñömö, Minitö wadâni nâni tede bai wædænque tedeyöminî botö godömenque nanguî tedebopa, ante Wængonguî ingante waa ate pönëninque apænebopa. ¹⁹Incæte Codito ingante mönö pönencabo tönö godongämæ pöninque botö wadâni nâni tede bai tæne tinco miido ganca tedequi

incæ wīī tededinque wæætē, Wadāni ēñencādānimpā, ante mēnea pōnī edonque apānedinque waa tobaīmopa.

²⁰Īñānāni ēñēedāni. Tæcæ ēñādāni īñōmō wēnæ wēnæ mōnō cæpāmo ante ēñēnāmaī īnānīpā. Mīnitō adobaī mānīnō wēnæ wēnæ mōnō cæpāmo ante ēñēnāmaī inte baī pōnēedāni. Wæætē ocaī mōnō pōnēnō guiquēnē mīnitō mānīnō ante wēñēñānīque wædænque nāni encadō baī wīī pōnēnīque wæætē picēñāni nāni nanguī encadō baī adobaī nanguī encate pōnēedāni.

²¹Dodāni mōnō Awēnē beyæ ante wææ ānīque īīmaī ante yewæmongadānimpā.

“Wadāni nāni tede baī nē tededāni īnānite botō āmo ēñēnīque tōmēnāni wæætē botō quīnāni īnānite apānecādānimpā. Incæte īñāni guiquēnē botō īmote cōwē ēñēnāmaī inguīnāni awædō, ante mōnō Awēnē angampa,” ante yewæmongatimpā.

²²Īnīnque, Wadāni nāni tede baī tedemīni ēñēnīque nē pōnēnāni wædāmaī īñōnāni nē pōnēnāmaī īnāni guiquēnē mǎnōmaī tedemīni ēñēnīque guīñente wæcādānimpā, ante cædinque Wængonguī Ōnōwoca pōnō cægacāimpā. Wæætē Wængonguī beyæ ante edonque apānemīni ēñēnīque nē pōnēnāmaī īnāni wædāmaī īñōnāni nē pōnēnāni guiquēnē do ēñencādānimpā, ante cædinque Wængonguī Ōnōwoca pōnō cægacāimpā. ²³Codito ingante mīni pōnencabo godongāmæ pōnīnque tōmāmīni wadāni nāni tede baī wadāni nāni tede baī tedemīni adīnque ayæ pōnāni guiquēnē nē ēñēnāmaī īnāni incæ nē pōnēnāmaī īnāni incæ æbānō anguīnānī. Mǎnōmaīnonque tedemīni ēñēnīque tōmēnāni wæætē, Mīnitō ōmædæcamīni inte ōnonque tedewēmīnīpā, ante wæbaīnānīpā.

²⁴Tōmāmīni wæætē Wængonguī beyæ edonque apāneyōmīni nē pōnēnāmaī ingā incæ nē ēñēnāmaī ingā incæ ponte ēñēnīque tōmāmīni mīni apānedō beyæ tōmengā, Botō wēnæ wēnæ cætābopa, ante wæbaingampa. Ayæ Wængonguī beyæ āmīni ēñente wædinque tōmengā,

Botō nāwangā wēnæ wēnæ cædōmo inte wentamō mongænte awædō, ante nāmā apāente āmaingampa. ²⁵Ayæ tōmengā mīmōno nānō wentamō wē wodōnincoo da tadonte ate baī edonque ate wædinque tōmengā ædæ wæænte guidōmēmæ ñongānīnque Wængonguī ingante, Bitō adobīque nē waa cæbi īmīpā, ante waa apānebaingampa. Ayæ mīnitō imīnite, Nāwangā Wængonguī Ōnōwoca tōnō āawocaque baī ewocāmīnīpā, ante apānebaingampa.

Quiēmē cæmīni incæ nōingā pōnente ædæmō cæedāni

²⁶Mǎnōmaī ī īnīnque īñānāni, mōnō æbānō cæquīī. Wængonguī Ōnōwoca pōnō cæcā ænīnque eyepæ inte mīnitō tōmāmīni godongāmæ pōnīnque īīmaī cæmīni incæmīnīpā. Adocanque āmotamīni adodeque angā ingampa. Wacā odōmoncæte ante adodeque apānecā ingampa. Wacā ingante Wængonguī edonque odōmonte apānecā ēñēningā inte tōmengā adodō ante adodeque ante odōmonte apānecā ingampa. Wacā guiquēnē wadāni nāni tede baī adodeque tedecā ingampa. Tōmengā æbānō ante tedecāā, ante wacā do ēñēnīque mīnitō tededō wæætē edonque apānecā ingampa. Mǎnōmaī wade wade ante nē apānemīni inte mīnitō tōmāmīni, Godongāmæ tǎi pīñænte entawengæimpā, ante īīmaī cæte tedecæmīnīpā. ²⁷Wadāni nāni tede baī tedeyongā wacā adotedæ wææ tededāmaī incæcāimpā. Māningā īnīnque tedecā ate wacā tedecæcāimpā. Ayæ wæætē wacā, Tedecæboimpā, angā Ao āmīni tedecā ate idæwaa. Mānimpodānīque tedete ñīne cædāni adīnque wacā ēñēnīnque, Æbānō ante tededānī, ante mīnitō tededō edonque apānecā ēñencāmīnīpā. ²⁸Codito ingante mīni pōnencabo weca nē ēñente adodō apānequēnengā dæ angā īnīnque edæ wadāni nāni tede baī nē tedēnīte wæcā īñōmō wæætē ee adīnque tededāmaī inte pæ wēēnecæcāimpā. Tōmengā nāmā

incæ önöwënenque tedete Wængongui ingante tedecæcäimpa.

²⁹Wængongui beyæ nê apænedäni adobaï mengäa pöni apænedäni ate idæwaa. Mänimpodäni apænedäni ëñëninque minitö, Nö ante apænedänii, idiquibæ ante apænedänii, ante apænte ante ëñencæminimpa. ³⁰Ayæ adocanque tæcæ apænee göñongä wacä nê ëñë congä ingante Wængongui Önöwoca iñontobæ apæneçä ëñëninque tömengä, Botö apæneçæboimpa, angä ëñëninque nê apænedingä wæætê apocænê edæ ëamonca ëñë concæcäimpa.

³¹Edæ Wængongui beyæ apænedinque adocanque täno apænete ñine cæcä ate wæætê wacä wæætê wacä apænete ñine cæcæcäimpa. Mänömaï cædinque minitö godongämæ ëñente badinque wampo bawënenete ongoncæminimpa.

³²Wængongui beyæ nê apænedäni iñömö tömënanäi nämä önöwoca wææ äninque önöwënenque wädämaï inte ocaï pönete apænedänipa. ³³Edæ Wængongui incæ nê gänê pönënongå inte Yæ yæ wapiticæ godö tededämaï ingampa cæminii.

Wængongui quinäni Codito ingante näni pöncæcabo tömänäni wayömö näni cabo wayömö näni cabo godongämæ pöninque näni cæï baï cædinque, ³⁴minitö adobaï Codito ingante mini pöncæcabo godongämæ pöñömïni onquiyænäni inänite ämini tededämaï incædänimpa. Edæ, Apocænê ëñëmæwedäni, ante Mõitee wodi nänö wææ angai baï cædinque onquiyænäni wæætedö wæætê änämaï inte onguiñænäni näni änonque ëñëninque edæ ëñë concædänimpa. ³⁵Æbänö ante apænedänii, ante ëñencæte ante wædinque onquiyængä oncönê gote ate angä ëñëninque tömengä nänöogængä wæætê adodö apæneçä ëñencæcäimpa. Edæ Codito ingante mini pöncæcabo godongämæ pöñömïni onquiyængä iñömö, Guiñënete awædö, äninque ee tededämaï incæcäimpa.

³⁶Iñæmpa, Wængongui nänö angainö ante minitö adomïni que dicæ

mä pönëninque odömöminítawogaa. Wädäni ëñënämaï iñönänite minitö dicæ adomïni que Wængongui nänö apænedö ante ëñëmïnitawogaa. ³⁷Bitö, Wængongui beyæ nê apænebo imopa, ämitawo. Wængongui Önöwoca pönö cæcä äninque botö eyepæ ewocadinque nê nanguï cæbo imopa, ämitawo. Mänömaï ewocabi inte do ëñëmi ininque bitö, Mönö Awënê nänö wææ angainö ante Pabodo mäninonque ante yewæmongampa, ante, Näwangä impa, ante apænebaïmpa. ³⁸Wæætê mäninö ante æcänö ëñënämaï ina tömengä ingante wæætê mönö ëñënämaï ingäimpa.

³⁹Iñänäni, Mänömaï impa, ante pönëninque minitö, Wængongui beyæ apæneçæcäimpa, ante cæcæte ante cöwê nanguï cædäni. Ayæ, Pancadäniya wädäni näni tede baï apænedänipa, ante adinque minitö Baa änämaï iedäni. ⁴⁰Incæte quiëmê cæminäi incæ mïni pöncæcabo mïni godongämæ watapæ quëwënguinque ante nöingä pönete ædæmö cædäni.

Codito ñäni ömæmongacäimpa, ante

15 ¹Nöwo botö tönïñamïni ëñëedäni. Codito ingantedö ante botö do watapæ apænebo ëñëninque minitö mänineque ante Ao ante wede pönëninque edæ tæï ongömïnitapa. Nöwo guiquënë minitö, Mänine ante æbänö intawoo, ante oda cædämaï incæminimpa, ante botö adodö ante ædæmö odömönte yewæmömöi aedäni. ²Mänine ante watapæ apænebo ëñëninque edæ minitö adode ante wede pönëninque tæï ongömïni inte edæ mänine beyænque quëwëmaïmïnipa. Wæætê mänine botö watapæ apænedö ante æmæ pönëmïni ininque mïni pönënimämo incæ önömämoque pöni babairopa.

³Edæ mönö Codito tömengä nänö pönö cægainö ante botö ëñëno ante botö doyedê, Mänine ante mönö täno pönengäimpa, ante pönö apænebo ëñëmïnitapa. Nöwo wæætê,

Ēñencæminimpa, ante botō adode ante yewæmōmo acæminimpa. Wængonguī angā ēñente nāni yewæmongainō bai iinque cædinque mōnō Codito iñōmō wēnæ wēnæ mōnō cægainō ante teēmē mongænte wætētē wængacāimpa, ante impa.

⁴Ayæ, Wængā ate tōmengā baō ini ō ante māo daga wengadānimpa. Ayæ Wængonguī angā ēñente nāni yewæmongainō bai cædinque Codito mēōnaa go adoōnæque iñōnte do ñāni ōmæmōnte miingā quēwengacāimpa, ante mānīne ante impa. ⁵Ayæ ñāni ōmæmōnte quēwēnōngā inte tōmengā dobæ Pegodo weca ponte a ongongā acantapa. Ayæ ate tōmengā nānō nē ēmiñængaināni, Dote, nāni ānōnāni weca dobæ ponte a ongongā adānitapa. ⁶Ayæ ate mōnō tōñīfadāni quīniento ganca ayæ godōmenque nanguī iñāni godongāmæ ongōñōnāni tōmengā tōmēnāni weca do ponte edæ a ongongā adotedæ agadānimpa. Iñāni iñōmō pancadāniya ñōwo do wængadānimpa. Pancadāniya nanguī iñāni nē againāni incæ ayæ miināni quēwēnānipa. ⁷Mānīnāni adāni ate Itota wætētē Tantiago weca a ongongā agacāimpa. Ayæ ate tōmengā nānō nē da godongaināni weca adocā Itota ponte a ongongā agadānimpa. Itota mānōmaī cægacāimpa, ante botō, Mānīne tāno pōnengæimpa, ante yewæmōmopa.

⁸Botō guiquēnē nē wæmpodingā bai inte wæyōmote tōmengā ñōwo pōñi botō weca a ongongā atabopa. ⁹Edæ Codito tōmengā nānō nē da godongaīmo imo incæ botō wadāni tōmengā nānō nē da godongaināni bai wīi adobaī imopa. Edæ Itota ingante godongāmæ nāni pōnencabo iñānite nē togænte pangaīmo inte botō wædāmo pōñi imopa. ¹⁰Edæ æbāmē imo incæte Wængonguī waadete pōnō cæcā beyænque botō mānōmaī imopa. Edæ tōmengā nānō pōnō cædo ante botō wīi ōnonque cæcæte ante æmoimpa. Wætētē wadāni wædænque cæyōnāni tōmengā waadete pōnō cæcā ænīnque botō godōmenque nanguī

cætābopa. Incæte botō dicæ tōmēmoque adoboque cæbogaa. Wætētē Wængonguī nānō waadete pōnō cædo ænīmo inte botō tōmengā tōnō cædinque nanguī cæbo imopa. ¹¹Iñīnque botō apænebo incæ tōmēnāni apænedāni incæ mōnō Codito tōmengā nānō pōnō cægāinonque ante tōmāmōni apænemōnipa. Mānīneque ante apænemōni ēñēnīnque mīnitō mānīneque ante pōnēmīnitapa.

**Do wængaināni incæ ñāni
ōmæmoncædānimpa, ante**

¹²Iñīnque, Codito do ñāni ōmæmongacāimpa, ante apænemōni ēñēmīni incæte pancamīniya, Nē wængaināni dicæ ñāni ōmæmōnāniyaa, ante ædō cæte ānewēmīni. ¹³Iñæmpa, Cōwē ñāni ōmæmōnāmaī iñāni bai mōnō Codito incæ adobaī ñāni ōmæmōnāmaī incædongāimpa. ¹⁴Ayæ Codito ñāni ōmæmōnāmaī ingā bai tōmengā waa pōñi nānō pōnō cægainō ante quīnante apænequēnēmōni. Edæ ōnonque pōñi bacædōnimpa. Ayæ ōnonquedō ante apænemōni bai mīnitō mānīne ante pōnēmīni incæ ædō cæte quēwenguēnēmīni. ¹⁵Mōnitō godōmenque Wængonguī ingante ante apænedīnque, Codito ingante Wængonguī incæ angā ñāni ōmæmongacāimpa, ante apænetamōnipa. Iñīnque, Nē wængaināni cōwē ñāni ōmæmōnāmaī iñānipa, ante mīni ānewēnō iñōmō nāwangā i bai mōnitō Wængonguī nānō cægainō ante babæ wapiticæ ante edæ apæneædōmōnimpa. Edæ, Cōwē ñāni ōmæmōnāmaī iñānipa, ante mīni ānewēnō nāwangā i bai Wængonguī, Ñāni ōmæmōe, ante ædō cæte anguēnengā.

¹⁶Iñæmpa, Ñāni ōmæmōnāmaī iñānipa, ante mīni ānewēnō nāwangā i bai Codito incæ adobaī ñāni ōmæmōnāmaī incægacāimpa. ¹⁷Ayæ Codito ñāni ōmæmōnāmaī ingā bai mīnitō mīni wede pōnēnō incæ ōnonque pōñi pōnente incædōnimpa. Iñīnque wentamō mīni mongænō ædō cæte ñā mēnongaquēnēmīni. Mīni wēnæ wēnæ

cædinō beyæ wentamō mongænte wæcædōminimpa. ¹⁸Māninō ante mini ānewēnō nāwangā ī bai Codito nempo quēwēninque do wængaināni incæ do mempoga wæninque ædō cæte quēwenguēnēnāni. Quēwēnāmaī incædōnānimpa. ¹⁹Codito pōnō ængā beyænque mōnō adopoque wæninque wæætē wænāmaī quēwengæimpa, ante mōnō inguipogaque pōnēninque wæmo bai wadāni wædænque wæwēñōnāni mōnō godōmenque nanguī wæwenguēnē incædōnimpa.

²⁰Incæte Codito dobæ ñāni òmæmongacāi apa ānewēmīni. Edæ waodāni tānomō amiñayonte tā pedāni bai cædinque Wængonguī adobaī, Do wængaināni inānite āmo ñāni òmæmoncædānimpa, ante cæcæte ante cædinque Codito Tānocā ingante do angā ēñēninque ñāni òmæmongacāimpa. Nāwangā impa, ante āmo ēñēmaimīnipa. ²¹Edæ waocā incæ adocanque ēñēnāmaī cæcā beyænque mōnō wænguīmāmo pongatimpa. Ayæ nē wænguēnēmō inte wæyōmonte Ñōwocā Waocā ēñagaingā inte wæninque ñāni òmæmongā beyænque mōnō ñāni òmæmonte quēwenguīmāmo adobaī pongatimpa. ²²Edæ mæmæ Adāō wodi tōmengā tōnō tōmāmō godongāmæ nē wænguēnēmō bagaiīmō inte mōnō tōmāmō adobaī Codito tōnō godongāmæ nē ñāni òmæmonguīmō bagamōimpa. ²³Incæte to amiñayedē tānomō ñāni tā pedōmō bai inongā inte mōnō Codito adobaī Tānocā inongā inte edæ tāno ñāni òmæmongacāimpa. Codito nempo nē quēwēnōmō guiquēnē mōnō ayæmō inōmō inte edæ tōmengā nānō ponguīōnæ iinque ba ate mōnō māniñedē ate nē ñāni òmæmonguīmō imompa.

²⁴Māniñedē ate inguipoga awēnē odeyēidi nempo ongoncoo incæ Codito tōmancoo ò ante òmæe ewencæcāimpa. Ñænænāni nāni ānōmāmo adobaī tōmāmāmo òmæe ewencæcāimpa. Tæi piñænāni nāni nanguī cædoncoo incæ Codito adocā incæ tōmancoo

wido cæcæcāimpa. Ayæ adocā nē Awēnē Odeye inongā inte tōmengā nempo ongoncoo wæætē edæ Mæmpo Wængonguī nempo edæ pædæ godongā æninque Mæmpo Wængonguinque tōmenganque adocanque Awēnē Odeye inongā incæcāimpa. Māniñedē ate edæ ñōwo mōnō quēwēmāmo iñōmō edæ iinque baquinō anguēnē. ²⁵Incæte Wængonguī Codito ingante, Bitō imite nē piinte cægāināni tōmānāni inānite mō gongæncæbiimpa, ante cædinque tōmengā ònōwa gāānē nānō wæantodonganca edæ adocā Codito incæ māninō nānō iinque cæganca nē Awēnē inongā ingampa.

²⁶Ayæ tōmengā ingante nē piinte cædāni inānite æmæwo bæ tacā adinque adoque pōni mōnō wænguīmāmo incæ ayæ ongō adinque Wængonguī, Mānimāmo dæ bacæimpa, ante māo òmæe ewencæcāimpa. ²⁷Tōmengā nempo Wængonguī tōmancoo pædæ godongā æninque tōmengā nē Awēnē bacæcāimpa, ante do yewæmongatimpa. Mānōmaīnō ante yewæmonte ongō incæte Wængonguī nē pædæ godōnongā inte ædō cæte, Nāmā pædæ godōmopa, anguingā, ante edonque acæimpa. ²⁸Ayæ ate Wængonguī Wengā incæ, Mæmpo Wængonguī botō nempo tōmancoo nē pædæ pōnongā inte tōmengā adocanque pōni Tæiyæ Awēnē badinque tōmenganque tōmancoo ènempocæcāimpa, ante cæcæcāimpa. Mānōmaī cæte ate tōmengā adobaī Mæmpo Wængonguī nempo quēwēninque Mæmpo nānō ānonque ante ēñente cæcæcāimpa.

²⁹Pancadāniya edæ, Do wængaināni beyænque cæmōnipa, ante cædinque tōmēnāni beyæ æpænē guiidānipa. Īninque, Ñāni òmæmōnāmaī ingæimpa, ante mini ānewēnō nāwangā ī bai tōmēnāni æbānō cæquēnēnāni ināni. Edæ, Ñāni òmæmōnāmaī ingæimpa, ante nāwangā ī bai edæ tōmēnāni nē wængaināni beyæ quīnante æpænē guiquēnēnāni. ³⁰Ayæ mini ānewēnō nāwangā ī bai mōnitō iñōmō quīnante

möni wantæ iñö wantæ iñö wodo wænguinö ante wæquënemöni. ³¹ Botö iimö iñö iimö iñö do wæwocabo inömo imopa, ante näwangä ämopa. Botö mönö Awënë Itota Codito nempo quëwëninque mīnitö imīnite ante pönëninque watapæ tobopa, ante näwangä antawoo. Edæ botö tönīñamīni iñöminite botö mäninö ante näwangä änimo inte, Wæwocabo imopa, ante adobaī, Näwangä impa, ante ämo ëñëmaimīnipa. ³² Waomö mönö äinënö æcæte ante botö epetoidi babæidi bai ināni tönö guëa wæætedö wææte cæbo bai önonque cæte incædönimpa. Edæ, Do wængaināni nāni ömæmönāmaī incædänimpa, ante näwangä ī bai botö, “Iimö ate mönö æmæwo wænguinque ante cæte bete tocæimpa,” ante nāni änewënö bai ante ee quëwencædömoimpa.

³³ Iñæmpa mänömainö ante tedewënāni ëñëninque mīnitö wææte oda cædāmaī imæwedāni. Edæ do yewæmöninque, “Wiwa cædāni tönö guëa cædinque bitö adobaī wapiticæ quëwenguinque godongämæ cæbipa.” ³⁴ Ante wææ änāni ëñëedāni. Edæ, mīnitö wënæ wënæ cæmīni adinque Wængonguī ingante ante ëñënāmaī ināni iñömö oda cæbainānipa. Mänömaī beyæ mīnitö guingo imonte wæquënemīni inöminī inte nö cæte quëwëninque edæ wënæ wënæ cædāmaī iedāni.

**Do wængaināni iimāi nāni
ömæmoncædänimpa, ante**

³⁵ Bitö, Do wængaināni æbänö cæte nāni ömæmonguināni, ante ämitawo. Ayæ, Nāni ömæmöninque mönö baö quinö bai ëñate ponguimö, ante ëñencæte ante wæbitawo. ³⁶ Iñæmpa önonquedö ante wæbi awædö. Edæ waocä tömëmö quiyacä ate yabæque nömāate ate tä bocate pædimö bai mönö baö adobaī inte nömængæimpa. ³⁷ Iñæmpa todigo incæ wawæ incæ bitö, Tä bocate pæcæimpa, ante cædinque do pædiwæ tömëwæ äenāmaī inte tömëmonque ænte godö quiyabi ate tä bocate pæpa. ³⁸ Incæte, Tömëwæ æbänö

iwæ pæquiwæ, ante nāmā nänö angainö bai cædinque Wængonguinque pönö badongä ate tä bocate pæpa. Wamö tä bocate pædinque æbänö incaquiī, wamö æbänö incaquiī, ante do ëñengaingä inte Wængonguī pönö badongä ate wainca wainca incapa.

³⁹ Tömāñö baö wīi adoyö bai ëñompa. Mönö waomö baö wayö ëñamompa. Ööingäidi baö wayö ëñadänipa. Ayamöidi baö wayö ëñadänipa. Gayæidi baö wayö ëñadänipa. ⁴⁰ Ayæ öönæde quëwënāni wayö mongæñönāni inguipoga quëwëmö iñömö wayö ëñamompa. Iñinque öönæde quëwënāni waa nāni ëñadö wayö iñonte inguipoga quëwëmö waa pönī mönö ëñayö guiquënë wīi adobaī ëñamö imompa. ⁴¹ Woyowotæ apäicä iñömö itæde nænque nänö apāi bai wīi apäicampa. Pönömenque pönī apäicampa. Nëmöidi guiquënë wadö bai apäidänipa. Edæ nëmöidi incæ pancadāniya nāmöināni inte wædænque apäiyönāni pancadāniya waa pönī ëmönāni inte guinæ nanguī apäidänipa.

⁴² Mänīi quiyadimö yabæque nömāate ate tä bocate pædimö bai mönö adopoque wæmö ate mönö baö adobaī aquinö inte nömæmpa. Wææte iincayæ ate mönö baö nömæadāmaī inguinque wææte nāni ömæmonguimö imöimpa. ⁴³ Ayæ mönö guinëñate wægäinö wido cæte ate mönö waa pönī ëñaquinque nāni ömæmongæimpa. Edæ mönö aquinö wido cædinque mönö tæi pīñæñö baaquinque nāni ömæmongæimpa. ⁴⁴ Edæ inguipogaque quëwëninque mönö ëñayö wido cæte ate mönö öönæde pönīwoca ëñate ewocadinque mönö waiñö pönī ëñate nāni ömæmongæimpa.

⁴⁵ “Adäö wodi tänocä inongä inte në ewocacä badinque quëwengacäimpa,” ante yewæmongatimpa. Ayæ adobaī Adäö wodi bai Nöwocä mönö Codito incæ në ewocacä inte quëwëninque mönö imote pönongä æninque ewocate quëwëmompa. ⁴⁶ Inguipogaque në quëwengä guiquënë täno pongacäimpa. Mempoga në Quëwënongå guiquënë

ñöwoque ayæ pöningä inte në Quëwengä ingampa. ⁴⁷Täncä ingante badoncæte ante Wængonguï onguipoi guidimöi æninque badongacäimpa. Nöwocä guiquënë öönædë quëwengaingä inte pongacäimpa. ⁴⁸Inguipogaque ante quëwënanäi guiquënë inguipoga täno quëwengaingä bai adobai inänpa. Öönædë mönö goquincabo guiquënë öönædë quëwente Pongaingä bai adobai imompa.

⁴⁹Inguipogaque quëwengä nänö ëñayö bai mönö adobai ñöwo ëñamompa. Ìncayæ ate guiquënë öönædë quëwente në Pongaingä nänö ëñayö bai mönö adobai ëñaquimö imompa.

⁵⁰Botö töninäminäi apänebo ëñeedäni. Adopoque ëñagaingä inte Wængonguï Awënë Odeye nempo ædö cæte guite quëwenguingä. Në aquiiñö ñömænguiñö ëñadongä incæ tömengä mempoga ëñadämaï inte ædö cæte baö ñömäadämaï iñö ëñaquingä. ⁵¹Mönö waocabo wëenënedë mönö ëñënamäi ingainö ante botö tæcæ ëñënimö inte ñöwo edonque apänebo ëñeedäni.

Wii tömämö wænguimö imompa. Incæte tömämö iñontobæ wayonque ëñaquimö imompa. ⁵²Edæ todompeta mönö ancadeca æmæwo pönä nanguï öönäni ate mönö awinca adopoque bomö cæyömönte iñontobæ bacæimpa. Edæ todompeta tæcæ we ööñönäni do wængainäni incæ ñömænämaï nänäi inguinque ñäni ömæmoncædänimpa. Mäniñedë edæ wayonque pönä mönö tömämö ëñacæmöimpa. ⁵³Edæ mönö baö mönö aquii ñömænguiñonque wido cæte ate mönö ñömænämaï inguiñonque ëñaquingä impa. Ayæ mönö aquii wænguiñö ewente ate waiñonque mönö wænämaï inguiñö ëñacæimpa. ⁵⁴Mönö ñömænguiñö ëñamö adinque Codito waiñö pönongä ænte ëñadinque mönö baö ñömænämaï ingäimpa. Ayæ mönö wænguiñö ëñamö adinque tömengä mönö wænämaï inguiñö ante waiñö pönä pönongä ëñacæimpa. Mänömaï cæcä ate dodäni nänäi yewæmonte angainö tömää iinque cæte ingäimpa.

Edæ iimaï ante yewæmongadänimpa. “Mönö Codito në tæi piñänongä inte mönö wænguimämo godö ömæe ewëninque gänä cæcæcäimpa. ⁵⁵Ïninque önonque bagai inte mönö wænguimämo iñömö dicæ tæi piñænte cæpa æmæwo wænguimö. Mönö wænguimämo incæ dicæ daapa emiñæmpa guï wænguimö.”

⁵⁶Mönö wënæ wënæ cægainö beyænque mönö daapa guite bai pante wæquinque në wænguënemö ingamöimpa. Ayæ ëñënamäi cæyömönte Wængonguï wææ angä beyænque mönö në pante wæquinque në wænguënemö bagamöimpa. ⁵⁷Wæætë mönö Awënë Itota Codito gänä cædinque mönö wænguënemämo ante godö ömæe ewengä beyænque Wængonguï mönö imonte pönö cæcä ate gänä cæmöimpa. Ïninque, Mänömaï waa pönä cæcampa, ante pönëninque mönö Wængonguï ingante waa ate pönëninque apænecæimpa.

⁵⁸Mänömaï beyæ botö në waadete töninäminäi ëñeedäni. Minitö, Mönö imonte bæ tadämaï incædänimpa, ante adiyæ tæi ongönte wææ cæedäni. Edæ, Mönö Awënë nempo quëwëninque nanguï cæmö Ïninque mönö cædinö iñömö edæ cöwë ewënamäi ingäimpa, ante pönëninque minitö mönö Awënë beyæ ante cöwë godömenque gomonga cæcæminimpa, ämopa.

Wængonguï quinäni beyæ iimaï cæte godongäimpa, ante

16 ¹Ñöwo iñömö minitö godönte æinta ante, Wængonguï quinäni beyæ impa, ante mini godonguënëno ante apänebo ëñeedäni. Gadatiabæ iñömö Itota ingante godongämæ nänäi pönencabo inänte do änimö inte botö minitö iminite adobai ante iimaï ämo cæedäni. ²Minitö tömäminäi, Botö ænincoo æpodö i, ante adinque, Pancaa Wængonguï quinäni quï baquimpa, ante cædinque Wængonguï itædë iñö pancacooga nänëne cö cædinque wacä Wængonguï itædë iñö pancacooga

nänënë cō cædinque ee mäedäni. Ìnque wæætē wæætē cō cæte eyepæ mämīni adinque botō mīnitō weca ponte adinque, Godömenque cō cæedäni, ante änāmaī inguēnēmo ïmopa. ³Edæ botō mīnitō weca ponte äñōmo mīnitō, Ìñāni nō cædōnāni inte mōnitō godōnincoo ænte mǎo godoncædānīmpa, ante odömōmīni adinque botō wæætē tōmēnāni beyæ cadota ante yewæmoncæboīmpa. Ayæ cadota tōnō mīnitō pōnōnoncoo tōnō botō Ìñāni ïñānite pædæ godōninque da godōmo ænte mǎo Eedotadēē gote nēnem pocædānīmpa. ⁴Ayæ Wængonguī Ao angä ate botō tōmēnāni baī adobaī gobo adinque tōmēnāni botō tōnō godongāmæ edæ gobainānīpa.

Ïmaī gocæboīmpa, ante

⁵Cōwē Mäatedōniabæ wodo pænta gocæboīmpa. Ìnque mämīma tǎno wodo pænta gote ate botō ayæ wæætē mīnitō weca poncæboīmpa. ⁶Ayæ mīnitō weca pōninque wabānō wantæ ïñō quēwente goquīmo. Æbāmē cæcæboīmpa. Edæ, Quēwente ate ædōmē gomonga gocæ cæyōmo mīnitō botō tōnō godongāmæ waa cæmīni ate waa gocæboīmpa, ante pōnēninque botō wabānō godömenque quēwēninque tōmāā mōnō yoguiintedæ incæ mīnitō weca quēwencæboīmpa. ⁷Edæ, Botō wodo pænta gocæ cædinque mīnitō weca ñōwo pōmo baī wantæ ïñō ēñāquinque incædōnīmpa, ante pōnente wædinque botō wīī ñōwo pōinēmo ïmopa. Wæætē, Wængonguī Ao angä ate botō ïncayæ ate mīnitō weca ponte wantæpiyæ quēwēninque tocæboīmpa, ante pōnēmopa. ⁸Wæætē mōni oodeocabo ææmæ Pentecotee mōni änōmæ ïinque beganca botō Epeto adoyōmō quēwencæboīmpa. ⁹Edæ Epeto ïñōmō quēwēnāni wede pōnente bacædānīmpa, ante botō guiite apænequinque odemō baī wi ænete baī ongō abopa. Ayæ adobaī, Nē piinte cædāni nanguī ïñāni mæ ongōnānīpa, ante adinque botō adoyōmō quēwēninque nanguī wææ apænecæboīmpa.

¹⁰Tīmoteo mīnitō weca wabānō ponguingä. Pongä ïnque mīnitō wæætē, Mōnitō weca guiñēnāmaī inte quēwencæbiīmpa, äninque tōmengä ingante waa cæedāni. Edæ botō nē cæbo ïmo baī tōmengä adobaī Wængonguī beyænque nē cæcä ingampa. ¹¹Ïnque, Tīmoteo önonque cæcampa, ante tedewēnāmaī inte mīnitō tōmengä ingante Baa änāmaī incæmīnīmpa. Wæætē waadete cædinque da pōnōmīni ate tōmengä piyænē cæte botō weca adodō poncæcāīmpa, ämopa. Edæ, Mōnō tōniñadāni tōnō Tīmoteo godongāmæ poncæcāīmpa, ante pōnēninque botō wānō cōmopa.

¹²Botō mōnō tōniñacä Apodo ingante guiquēnē, Mōnō tōniñadāni tōnō bitō coodintoidi weca ēñate pōe, ante ancaa ämo incæte tōmengä wæætē, Ñōwo wīī goquīmo, ante Baa angantapa. Incæte Wængonguī Ao angä ate tōmengä ïncayæ ate mīnitō weca cōwē poncæcāīmpa.

Waa quēwencæmīnīmpa, ante

¹³Mīnitō guiquēnē cōwä ate nāmā wææ aedāni. Wede pōnēmīni inte tæī gongænte ongödäni. Æmæwo pægāimīni inte tæī piñænte entawēninque guiñēnāmaī inte ee cæedāni. ¹⁴Ayæ tōmāā quiēmē cæmīni inte waadete pōnēninque cæedāni ämopa.

¹⁵Botō tōniñamīni mīnitō ïmaī ante do ēñēmīnīpa. Acayabæ ïñōmō tǎno pōnengaināni inte Etepānā nāni quēwencabo ïñōmō, Wængonguī quīñāni ïñānite nē cæmōni bacæmōnīmpa, ante ñōwo cædānīpa cæmīnīi. ¹⁶Ïnque mīnitō Wængonguī quīñāni beyæ nē cædināni ïñānite Ao äninque piyænē cædinque tōmēnāni nāni äñō baī do ēñente cæedāni. Ayæ, Wadāni adobaī, Mōnō tōnō godongāmæ nanguī cædānīpa, ante adinque mīnitō tōmēnāni nāni äñō baī do ēñente cæedāni.

¹⁷Etepānā tōnō Podotōnato ayæ Acaico botō weca pōninque mīnitō botō beyæ mīni cæinēnō ante do cædāni ate nanguī totabopa. ¹⁸Edæ tōmēnāni pōnō

apænedäni ëñëninque mînitö wampo pönente tæi piñænte ëwocamînitawo. Ayæ adobaï pönö apænedäni ëñëninque mönitö wampo pönente tæi piñænte ëwocamönipa. Mänömaï nê pönö cædinäni inänite mînitö wæætê waa ate pönëninque cæquënëmîni imînipa.

¹⁹Atiabæ iñömö Codito ingante godongämæ nâni pönencabo nâni cabo nâni cabo tömänâni mînitö imînite ante pönëninque, Waa quëwencæmînimpa, ante apænedänipa. Aquidæ tönö Pidica nâna gæncaya adobaï ayæ tömëna oncönë Codito ingante pönente godongämæ pöninque nâni pönencabo adobaï mînitö imînite waadete pönëninque, Mönö Awënë nempo waa quëwencæmînimpa, änänipa. ²⁰Mönö tönîñadäni tömänâni, Waa quëwencæmînimpa, ante apænedänipa.

Mînitö guiquënë mîni cabo godongämæ pô bee tëninque waadete pönente waa apæneedäni, ämopa.

²¹Botö Pabodobo iñömö tæcæ tömëmo önompoca yewæmöninque, Waa quëwencæmînimpa, ante tömëmo yewæmömopa.

²²Æcänö mönö Awënë ingante waadete pönënamai ina iñömö tömengä nänö wænguinque mänömaï cæcampa töö. Botö iñömö wæætê, Mönitö Awënë imi pöe, ante wæbopa.

²³Mönö Awënë Itota waadete pönö cæcä æninque mînitö tömengä nänö waadete pönö cædü entawëninque waa quëwencæmînimpa. ²⁴Codito Itota nempo mönö quëwencabo imompa, ante pönëninque botö mînitö imînite waadete pönëmopa. Mäninque ante yewæmömopa.